


尹少宰奏議
一







尹少宰奏議

(一)

尹會一著
張受長編

尹少宰奏議

本館據畿輔叢書
本排印初編各叢
書僅有此本

尹少宰奏議目錄

卷一兩淮疏

謝署鹽政疏

敬抒誠悃疏

請濟浙鹽疏

清理江廣浮費疏

巡查鹽場疏

奏收餘鹽疏

謝加僉都御史疏

議撥鹽義倉疏

奏明節省疏

卷二河南疏一

謝署巡撫疏

確查撫恤事宜疏

奏明豫省吏治疏

請免歉歲息穀疏

樽節二麥疏

請免開墾陞科疏

運確便民疏

請建營倉疏

議禁酒麴疏

請給飯食修築民隄疏

卷三河南疏二

請設社學疏

回奏秋審疏

覆奏盜案疏

劾奏藩司疏

請免水田陞科疏

敬陳農桑四事疏

請寬辦料限期疏

查禁酒麴疏

卷四 河南疏三

謝實授巡撫疏

請減水田重糧疏

議除常平弊竇疏

請增先儒博士疏

畫區清理灘地疏

接濟直省麥石疏

請增晒麴禁例疏

恭報二麥收成疏

奏明以麥還倉疏

撲蝻祀蜡疏

奏交直省麥石疏

報完直省麥石疏

敬陳險要疏

卷五河南疏四

再議禁麴疏

覆奏封麴疏

請豁浮糧疏

酌量還倉疏

請增漕價疏

請增漕價第二疏

請增漕價第三疏

酌議命盜條奏疏

卷六河南疏五

科場辦理事宜疏

奏報栽樹成數疏

接濟直省米石疏

碾運直省米石疏

請旌孝子疏

請旌節婦疏

請旌貞烈疏

辦理經書疏

請刊經書疏

題請湯文正公從祀疏

卷七河南疏六

大水自劾疏

彙報被水情形疏

續報被水情形疏

覆奏賑恤事宜疏

預籌民食四事疏

酌辦撫綏三事疏

題請蠲緩漕疏

題請加賑疏

題請續報加賑疏

請蠲錢糧疏

請蠲續報錢糧疏

題報秋收分數疏

卷八 河南疏七

議覆轉運楚米疏

議覆轉運陝米疏

覆奏濬河疏

奏報麥田得雪疏

奏明開賑日期疏

謝補副都御史疏

卷九 燕臺疏

請昭信從疏

陳情終養疏

謝賜詩章匾聯疏

謝賜寧絀貂皮疏
辭授工部侍郎疏

卷十 江蘇疏

謝督學江蘇疏

敬抒草野見聞疏

優禮布衣疏

敬敷小學之教疏

經義務求實學疏

請復學政舊規疏

察舉布衣疏

謝督學留任疏

謝授吏部侍郎疏

督學遺疏

尹少宰奏議卷一

兩淮疏

署理兩淮鹽政。臣尹會一謹奏。爲恭謝天恩事。乾隆元年二月初五日。奉上諭。高斌已補授河道總督。其兩淮鹽政印務。著尹會一署理。仍兼管運使事。欽此。欽遵。於乾隆元年三月初三日。接准陞任鹽政高斌移交印信。臣隨恭設香案。望闕謝恩。祇受視事。伏念臣一介寒微。生逢盛世。荷蒙世宗憲皇帝拔之草莽。首擢銓曹。旋守襄陽。又調揚郡。特授兩淮運司。自惟才質庸愚。涓埃未効。今復蒙我皇上天恩。著臣署理兩淮鹽政。聞命自天。感激無地。雖捐糜頂踵。不足以上答高深。惟有愈懷冰兢。敬體天心。恤商便民。彌加奮勉。仰報隆恩於萬一。所有微臣感激愚衷。理合奏謝。惟是臣知識淺陋。膺此重任。實切惴惴。敬懇皇上天恩。俯賜訓示。俾得欽遵辦理。不致隕越。頂感高厚於無極矣。臣謹一并奏懇。統乞皇上聖鑒。謹奏。

乾隆元年三月初三日。

署理兩淮鹽政。臣尹會一謹奏。爲感沐恩訓。敬抒誠悃事。竊臣奏謝天恩摺內。欽奉皇上硃批。向聞汝操守清廉。辦事尙屬明白。而且實心任事。故有此用。勉力圖報。莫負初志。則將來之任用。正未可量也。若量小易盈。一有高興自足之念。則諸事不可爲矣。欽此。臣跪讀之下。如對天顏。如奉面命。伏念臣質本凡庸。學鮮實用。自服官以來。黽勉不遑。毫無足錄。夙夜內省。惟有寸誠自矢。今荷聖主特達之知。逾格擢

用。臣卽勉竭駑駘。尙不足以報稱萬一。何敢稍有改易。重負殊恩。茲蒙諭旨教誨。臣亦不敢以虛詞陳奏。惟益堅初志。深戒盈滿。時時以實心實政自勉。凡力所可至。不稍留餘。才所未能。常加策勵。以仰副皇上訓誨。期勉之盛心。緣感荷恩訓。敬抒愚忱。恭摺覆奏。伏乞皇上睿鑒。謹奏。

乾隆元年四月初六日奉硃批。好。著實勉力。以副朕任用之恩。欽此。

署理兩淮鹽政。臣尹會一謹奏。爲敬體聖心。酌請通融。接濟浙鹽。以平市價。以裕民食事。竊照鹽斤之於民食。亦猶米穀之不可缺少。然米穀則各省有無相通。緩急相濟。獨至於鹽而不爲酌量通融者。泥於行鹽各有綱地之故也。夫普天率土。同爲朝廷之赤子。籌畫變通。宜體軫恤之深仁。茲因浙省鹽價昂貴。欽奉諭旨。交大學士嵇曾筠。多方調劑。使之平減。俾商民均受其益。仰見聖主廡念民依。無所不至。茲准大學士嵇曾筠。知會到臣。臣查鎮江府屬。係行銷浙鹽。每斤賣錢十六七文不等。較之往時。實屬昂貴。瓜揚係行銷淮鹽。每斤止賣錢九文。一江之隔。貴賤懸殊。民情喜賤惡貴。大率皆然。但鹽少則價貴。鹽多則價賤。今聞浙鹽之貴。由於鹽少。如使鹽斤充裕。其價自然平減。兩淮產鹽豐裕。現有存餘之垣鹽。可以酌撥通融。暫時接濟鎮江民食。平減市價。卽交常鎮道就近經理轉發。認運鎮江府屬之浙商。按照浙引行銷。其每引應納課餉等項。均在浙省連庫完繳。准銷浙省額引。惟將淮鹽價直。及運送水腳。兌交常鎮道彙交兩淮運庫。歸還原款。今臣約計課餉鹽價水腳等費。每斤成本。不過一分許。其每斤賣制錢十二文。計直銀一分四釐。在百姓每斤卽省錢四五文。在商人每斤卽獲利三四釐。如至期核實。成本不須一

分其價再行酌減。如此哀多益寡。暫以淮鹽之有餘。轉濟浙鹽之不足。仍銷浙引。仍歸浙商。綱地無侵越之虞。百姓受平價之益。浙商收自然之利。而且鎮江府屬得此接濟。則應運鎮屬之浙鹽。又可轉濟他郡。鹽斤並得寬裕。價直均可平減。又不止鎮江府屬民生受平價之益也。且有此通融。鎮屬愚民。亦不致貪利越販。所裨實多。臣仰體皇上天下一家之聖心。無分此疆彼界。因時制宜。斟酌通融平價之法。札商大學士。稽曾筠。會摺恭奏。伏乞皇上訓示遵行。再三月二十日。鎮江府丹徒縣民越販私鹽。被巡役在於江口盤獲。致有爭鬧之事。現飭查究。實緣浙鹽過昂。愚民圖賤所致。謹一并奏明。統祈睿鑒。謹奏。

乾隆元年四月初六日。奉硃批。接濟浙鹽辦理之處甚妥。當應照所請行者。欽此。

署理兩淮鹽政。臣尹會一謹奏。爲據實奏明清理江廣浮費。仰祈睿鑒事。竊照商力之困舒。視乎費用之多寡。鹽價之貴賤。視乎成本之重輕。商人多一分之浮費。即多一分之成本。非惟病商。亦且病民。我皇上惠愛商民。體恤備至。臣職司鹺務。敢不敬體宸衷。悉心經理。查江廣口岸。有匣費一項。在於揚商鹽價內扣留。以爲致送該省文武各衙門規禮養廉等項。以及一切雜費。先經前鹽臣伊拉齊查明分別應裁。應存。造冊咨送前督臣高其倬覆核。恭呈世宗憲皇帝御覽。經部議覆。自雍正九年庚戌綱起。應照所議。留爲巡查等費。如有地方官借端需索。及口岸各商。敢於逢迎分送。該督撫立即題參。與受一并治罪。至口岸各商。虛冒開銷。許本商赴鹽政衙門呈告。卽行提審究追。奉旨依議。欽遵在案。伏查湖廣匣費。每綱原核存銀十二萬兩。江西匣費。每綱原核存銀三萬九千四百兩。今江廣匣費。每引扣至五錢有餘。按

引計費。湖廣每綱不下四十餘萬兩。江西每綱不下十餘萬兩。核之原定數目。多至數倍。費重價昂。商民並受其累。不可不亟爲清理。茲據揚商公稟。此項匣費。從前已奉核定。而司匣各商。歷年總不清算。商等鞭長莫及。請將收支各帳。開報核算。第恐原定之外。尙有支用。應酬之處。今寬裕扣留。酌議每引扣費三錢。湖廣約運銷八十萬引。計共扣銀二十四萬兩。較之核存原數。加銀十二萬兩。江西約運銷二十五萬引。計共扣銀七萬五千兩。較之核存原數。加銀三萬五千六百兩等情。除檄湖廣江西驛鹽道。就近督催司匣辦事各商。將收支帳目。據實開報。與揚商核算外。臣思江廣匣費。既經酌核議定。卽或原數之外。尙有不可少之費用。與不得已之應酬。亦何至多至數倍有餘。總緣匣費出自揚商。與匣商疴痒無關。而不按綱造冊。由運司驛鹽道核明。轉送鹽臣衙門。察銷出入。未有確數。與受無從查核。則其任情濫用。藉端冒銷之弊。在所不免。必須立法稽察。使商無浮費。事無掣肘。方爲妥協。但江廣相隔遙遠。非同揚州近在咫尺。易於稽察。今臣再四籌酌。現在設立循環印簿。給發江廣匣商。卽從乾隆元年丙辰綱爲始。照依揚商所議。按三錢一引扣收。將所收銀兩。與動支款項。逐日逐條。據實開載印簿內。循去環來。送臣衙門查核。至一綱完竣。通盤核算。如有盈餘。留爲下綱之用。若地方官有額外苛索。臣卽移咨督撫。查實題叅。若司匣商人有侵冒等弊。臣卽嚴提究追。俟兩綱後。核其實在應用數目。每引應扣費若干。再爲酌中。永杜浮濫。至匣費款項數目。從前奉部核定之後。卽經造冊。咨送江廣督撫。并發驛鹽道。備照在案。今立法清查。應令匣商將支用數目。按季造冊。并送該管驛鹽道核明。轉送督撫。就近查察。更爲有益。臣謹據實

繕摺恭奏懇祈皇上訓示遵行謹奏

乾隆元年七月二十六日

兩淮鹽政。臣尹會一謹奏。爲奏明巡查鹽場事。竊照場竈爲鹽法根本之地。最爲緊要。臣查淮南二十五場。縣互八百餘里。淮北五場。縣互四百餘里。皆坐落沿海。地方遼闊。非親身遍歷。不能周知各處情形。酌宜辦理。臣才識庸愚。荷蒙皇上天恩。畀以鹽政重任。實切蚊負之懼。謹擬親往兩淮南北各場查勘形勢。體察竈情。如有關於私鹽要隘。竈戶休戚之處。應須因地制宜。隨時調劑。以及裝運鹽船之河道。捍禦海潮之隄工。節宣河水。以資灌溉之渠閘。凡與商竈鹽務有益者。臣俱詳查確籌。悉心料理。其應行具奏事件。臣卽繕摺奏請聖訓遵行。臣仍隨處宣布皇仁。曉諭丁竈。各勤本業。煎曬售商。不得通梟濟私。干犯法紀。以上體聖主惠愛海隅蒼生之至意。臣謹將親往巡查各場緣由奏明。伏乞皇上睿鑒。謹奏。

乾隆元年九月初二日

兩淮鹽政。臣尹會一謹奏。爲奏明收買餘鹽。以裨商竈。以杜透漏事。竊照各場竈戶。藉鹽爲生。俯仰衣食之計。皆取給於此。所產鹽斤。不歸商配引。卽售梟濟私。此必然之勢。故欲杜私販。必先清竈鹽。使無存積。查寒冬歲暮之時。竈戶需用尤殷。待售尤急。各場買商。或乘其窘迫。過爲刻減價直。以致竈情難堪。或商力不繼。未能全數收買。以致鹽歸囤販。臣已切諭各商。務必公平交易。多發課銀。廣爲收買。誠恐場商之內。實有力量一時不能接濟。若不設法收買。不但竈戶度歲拮据。其透漏之弊。斷難禁除。臣查運庫

內存有充公開款銀兩。可以通融濟用。臣擬至期酌量發給場員。收買餘鹽。存貯場垣。俟捆運之時。卽照原買價直。給商配引行銷。價銀歸還運庫原款。一轉移間。竈戶既得資其急需。餘鹽不致透漏私販。而商力之不及者。又得藉以接濟。所裨實多。緣所動銀兩。非關解部之項。又係隨時動支。旋即還補。是以未敢具題。謹將酌議收買餘鹽緣由。據實奏明。伏乞皇上睿鑒訓示。謹奏。

乾隆元年十月十二日奉硃批。知道了。欽此。

都察院僉都御史管理兩淮鹽政。臣尹會一謹奏。爲恭謝天恩事。竊以譴陋寒微。叨蒙皇上特達之知。逾格委用。由運使署理兩淮鹽政。寸長未効。時切悚惶。今復重邀寵命。特加僉都御史銜。管理兩淮鹽政。一年之內。疊荷殊恩。五中感激。莫可名言。伏念兩淮鹽務殷繁。而臣才微任重。曷克仰酬高厚。惟有敬體愛民恤商之聖心。勉竭愚誠。悉心經理。據實陳奏。恭請聖訓。遵行以仰副皇上委任至意。所有感激微忱。理合繕摺奏謝。伏乞皇上睿鑒。謹奏。

乾隆元年十二月初三日奉硃批。知道了。勉力爲之。以副朕任用之意。欽此。

都察院僉都御史管理兩淮鹽政。臣尹會一謹奏。爲積貯攸關。酌議分撥。敬懇聖訓事。竊照揚州鹽義倉。欽蒙世宗憲皇帝軫念江南民生。籌畫儲備。於雍正四年奉旨。將商捐銀兩。建蓋倉廩。買貯米穀。交商管理。查原奉廷議。以揚州府爲安徽江蘇道里之中。卽鄰省亦一水可通。是以議於揚城建倉積貯。今各處倉糧充實居多。卽本省偶有歉收賑恤之處。各於本邑常平倉穀就近動用。而鹽義倉相距路遠。不

能卽時應用。輾轉議撥。旣需時日。又費運腳。殊多未便。是以近年未經撥用。今倉內現貯穀二十七萬六千餘石。米三萬七千餘石。雖有存七糶三之例。因附郭之江、甘、兩縣。俱有常平倉。應糶穀石。而貼近之邵伯鎮。又爲諸路糧食匯聚之所。鹽義倉穀。商人艱於糶賣。未能出陳易新。揚城地方潮溼。易致霉沓。虧折。據商人賠補過三萬餘石。誠恐積久。霉朽愈多。所關非細。又泰州、通州、海州、如皋、鹽城、板浦、石港、東臺、阜寧等處鹽義倉。共額穀二十六萬二千餘石。米三萬八千餘石。內泰州倉貯穀十四萬三千餘石。米二萬四千餘石。爲數最多。鹽屬積貯已足。無可改撥。出易又難。據商人賠補過一萬五千餘石。積久堪虞。所有揚、泰二倉存貯米穀。必須斟酌變通。以重倉儲。臣悉心確議。揚州倉酌存穀八萬石。泰州倉酌存穀六萬石。尙餘米穀合計四十萬餘石。請以撥補本省上年被水州縣動賑倉穀。以省買補之費。并於附近標鎮協營。量其額兵多寡。酌撥分貯。或數千石。或數百石。春借秋還。免其加息。以爲惠濟兵丁之需。在揚、泰二倉。可無紅朽之虞。而分貯各處。動用均得便易。江省兵民。更獲實濟之益。至撥運米穀腳價。統於運庫節存。巡費項下動支。仍先儘好穀分撥各處。其米穀內有存積年久。未便撥貯者。交給商人領出變價。另買新穀貯倉。務足酌存八萬六萬之數。不敷價直。循例於商捐公項補給。至分撥各營穀石。或有公所可貯。或須酌建倉房。俟奉旨允。查明辦理。是否有當。伏乞皇上訓示遵行。謹奏。

乾隆二年二月初六日。

都察院僉都御史管理兩淮鹽政。臣尹會一謹奏。爲奏聞節省事。竊照丙辰綱奏銷已竣。所有經費

腳費等銀。共十二萬四千六百五十三兩零。內除例應支用、水腳銀三萬七千五百十八兩零。總理鹽政督臣趙宏恩養廉三千兩。陞任鹽臣高斌支用養廉銀七千九百五十八兩零。臣支用養廉銀六千九百五十八兩零。又幫貼總河臣高斌養廉銀七千兩外。實節省銀六萬二千二百十八兩零。現貯運庫。報明戶部聽候撥解。謹將收支節省各數。開摺恭呈聖覽。謹奏。

乾隆二年二月初六日。

尹少宰奏議卷二

河南疏一

都察院左僉都御史署理河南巡撫。臣尹會一謹奏。爲恭謝天恩事。乾隆二年三月二十六日。內閣奉上諭。昨曾降旨。著尹會一署理廣東巡撫。今尹會一以伊母年踰七旬。不能赴任。就養爲辭。情甚懇切。著調署河南巡撫。王暮著前往署理廣東巡撫。欽此。欽遵。臣於四月二十一日。抵任受事。伏念。臣譴陋。凡材。毫無知識。屢蒙聖主。擢用深恩。由運使署理兩淮鹽政。旋加僉都御史銜。管理鹺務。正以涓埃未報。時切悚惶。欽奉諭旨。著。臣進京陛見。幸得仰覲天顏。跪聆聖訓。乃又恭承恩命。署理廣東巡撫。臣因母老。瀆陳烏鳥之私。復蒙聖主推恩錫類。教孝勵忠。調署中州近地。俾得奉母就養。天恩高厚。極頂踵以難酬。臣識庸愚。顧封疆而滋懼。天中爲四達之地。撫綏當最要之時。臣惟有勉竭駑駘。欽遵訓旨。休養黎庶。整飭官方。實心實力。多方經理。以期仰副皇上簡畀之至意。所有微臣感激下悃。理合繕疏。恭謝天恩。伏祈皇上睿鑒施行。謹具奏聞。

乾隆二年四月二十一日。

都察院左僉都御史署理河南巡撫。臣尹會一謹奏。爲遵旨詳查議奏事。竊。臣在京。面奉聖訓。以豫省雨澤愆期。民瘼攸關。諭。臣確查實在情形。備悉奏聞。并將撫恤事宜。詳加籌畫。仰見聖主愛育黎元。不

使一夫失所至意。臣一入豫境。卽委員分路確查。臣自彰德、衛輝。至開封府省城。沿途親自查看。隨處體詢農夫野老。細察閭閻情景。悉屬安貼。各邑地畝。種麥十之七八。現俱成穗。將次結實。鄉民皆謂普律有收。但多寡不等。窪地每畝可收四五斗。高地可收二斗。如日內得雨。更逾此數。秋田早禾。有已長苗數寸者。有甫經出土者。現望透雨。以滋長養。此臣赴任經由彰、衛、開三府屬地方。目擊面詢之確實情形也。其懷慶府屬。已據委員查覆。勝於彰、衛、南、汝。六府四州。路遠尙未回覆。臣於二十日至省城。卽細詢南、汝等屬。因公在省之地方官。並司道各員。皆云。黃河以南各州縣。大率勝於河北之彰、衛二府。實無失收之處。此臣詢據屬員所述之情形。仍俟委員查覆到日。再行詳悉據實具奏。至撫恤事宜。誠如聖諭。緩徵一條。尤屬濟時拯災之急務。今豫省情形。雖與直隸不同。但麥收既有歉薄之處。秋田尙未得有透雨。應邀皇仁。將歉薄州縣錢糧。暫緩催徵。以紓民力。至各屬倉糧。今春青黃不接之時。已經借糶。兼行接濟民食。目今米價。亦不甚貴。臣又體訪民情。大概樂於借領。平糶次之。蓋平糶非現價不能買食。窮人尙費經營。借則急補目前缺乏。緩至秋收。不難還倉。是以豫省向來多從民便。春借秋還。今不拘存七糶三之數。惟視地方之緩急。斟酌多寡。借糶接濟。統俟麥收時停止。臣又細詢布政司溫而遜。各屬倉糧。率皆充裕。間有數處。舊因偏災動用。現存無多。卽或一時需用。亦可於附近鄰邑撥用。就目前情形。全省倉儲。詳加籌酌。毋庸議請截漕。臣又案查各屬申報。三月二十八、九等日。得雨三四寸者。共有四十一州縣。得雨一二寸者。共有四十八州縣。目下俱望大沛甘霖。臣抵任後。卽竭誠祈禱。謹就現在情形。酌議事宜。遵旨具奏。伏

候皇上訓示謹奏。

乾隆二年四月二十二日奉硃批。總理事務王大臣速議具奏。欽此。

都察院左僉都御史署理河南巡撫。臣尹會一謹奏。爲據實奏明。仰祈睿鑒事。竊臣荷蒙皇上天恩。畀以撫豫重任。欽遵訓旨。時時以察吏安民爲念。固不敢輕率紛更。以滋擾。亦不敢因循瞻顧。以誤公。查豫省吏治。頗有粉飾之習。漸至懈弛。臣抵任後。卽敬宣聖主宵旰勤勞。誠求治理之至意。訓勉大小屬員。各矢實心。力除舊習。臣仍不時訪察。如有不恤民隱。不顧官箴之劣員。卽行題叅。斷不姑容。惟是守令等官。與民最親。須得人地相宜。欽遵聖諭。使之久於其職。從容展布。以收循良之實效。今臣體察各員。內有繁簡異宜。兩不相稱之員。其才優於地者。不過未盡所長。而才絀於地者。恐難免貽誤之虞。現在勤加策勵。再行試看。倘限於才具。終無進益。必須改調者。容臣慎擇相當之缺。具題請旨調用。以裨吏治。但臣未敢擅便。謹先繕摺具奏。伏乞皇上訓示遵行。謹奏。

乾隆二年五月十八日奉硃批。是。欽此。

都察院左僉都御史署理河南巡撫。臣尹會一謹奏。爲請旨事。竊惟國家廣籌積貯。以備不虞。隨時借糶。以惠民牛。誠愛養黎元。接濟緩急之至計也。臣於通省倉儲。現在清查辦理。務期充實有備。伏查定例。出借倉穀。秋後補還。每石加息穀一斗。臣思借穀各有不同。加息似宜區別。如地方本非歉收。祇因春月青黃不接。循例借給百姓。出陳易新。自應加息還倉。至如偶值雨暘失調。或微被災眚之處。籌畫撫綏。

特行借給。此非尋常借穀可比。臣愚以爲秋後催還之時。宜廣皇仁。加恩優恤。止令繳還正穀。免其加息。小民終歲力田。粒粒辛苦。俯仰皆資。省此升斗之交官。卽裕升斗之食用。霑恩實溥。我皇上懷保萬民。事損上益下。惟期閭閻休養得所。臣因豫省去歲歉收之處。及今春雨澤偶愆。州縣民間借穀頗多。秋後卽應催還。謹陳愚昧之見。如蒙聖恩。允敬懇皇上特頒諭旨。著爲定例。俾各省一體欽遵。兆民均霑實惠。仍嚴飭有司。務必體恤民依。平斛收量。如有浮加斛面。額外多取。嚴叅治罪。爲此繕摺具奏。伏乞皇上睿鑒。謹奏。

乾隆二年六月初二日奉硃批。這所奏是有旨諭部。欽此。

都察院左僉都御史署理河南巡撫臣尹會一謹奏。爲奏聞事。竊照河南地方。仰賴皇上至誠感格。錫福蒼生。通省州縣。先後普被甘霖。秋禾具得播種。但查各屬二麥收成。厚薄不等。必須加意撙節。有備無虞。而東省春麥。又有失收之處。壤地相連。更需接濟。臣查躑麴一項。耗費麥糧甚多。若任其囤積。晒耗必致麥少價昂。大爲民累。臣今通飭禁止。留此麥石。以備本省鄰省民食之需。其東省聽民販糴。概不阻遏。又各屬倉穀。向係春月借糴。秋後補還。上年被水州縣。因秋收歉薄。尙未補足。今春又因雨澤稀少。借糴穀石。多有溢於存七糴三之數。署布政司溫而遜。恐將來艱於完補。詳請將上年及今春民借之穀。催令還麥。其官糴者。飭令買麥。俟秋間再爲易穀補倉。臣思去秋旣已歉收。今歲二麥。又厚薄不等。民間專資食用。若官麥一齊收買。市集難免騰價。小民有公私拮据之虞。臣敬體皇上愛養黎元至意。寧留有餘。

於百姓現飭各屬將上年未補穀石據實詳報。咨明內部。同今春借糶穀石。照例於秋後完補。但前後借糶倉穀。約計六十餘萬石。爲數繁多。又有上年被水州縣。漕米緩至今秋帶徵者。倉貯民生。均當熟籌。容俟秋間。再臣酌量情形。詳悉具奏。請旨遵行。謹將現在辦理之處。恭摺奏聞。伏乞皇上睿鑒。訓示。謹奏。

乾隆二年五月十八日。奉硃批。是極之見。欽此。

都察院左僉都御史。署理河南巡撫。臣尹會一謹奏。爲恭奏豫省民俗情形。并陳末議。仰祈睿鑒事。竊惟食爲民天。而足食在於重農務本。盡其地利。除其民累。我皇上恩深愛育。諭旨頻頒。臣欽承恪遵。現在督率屬員。實力奉行。伏查豫省民俗。素稱醴朴。迥非江浙浮奢可比。但不善經營。別無生財之道。其公私用度。皆藉於地之所產。而中州地多平衍。利鮮灌溉。早潦無備。全賴天時。恭遇國家重熙累洽。生齒日繁。而地土猶是。所以偶遇歉收。輒憂拮据。向者地畝寬廣。田溢於賦。前督臣田文鏡。王士俊。歷年共報墾。過一萬四千八十餘頃。自首地四萬八千九百一十餘頃。二共錢糧正耗二十萬有奇。在小民任土作貢。分所當然。第較之從前。已增歲額。臣惟有仰體天心。專務休養。教民撙節。導民儲蓄。不敢以煩苛矜幹濟。不敢以毫末累閭閻。至於有裨民生之事。毋論巨細。必詳悉熟籌。據實奏請訓旨。臣查各屬。易墾地畝。民間久經開闢。其所遺者。大都費力難墾之地。仰懇聖主蠲租減賦。藏富於民。查康熙九年。奉旨刊頒律例。田宅條下。開載山東、河南、及直隸等處。空閒地土。聽民儘力開種。永不起科。如蒙聖恩。特頒諭旨。所有荒地。嗣後聽民開墾。免其陞科。止令州縣給與印照。永遠收執管業。則小民俱無賠糧之慮。自生興利之心。

雖多費工本可望成熟者。將必勉力開墾。量其土之所宜。或種五穀。或植樹木。以盡地利。似於民生有益。至於鹽鹼不毛之地。煎土熬硝。又爲窮黎衣食之資。是以謬抒通商便民之議。另摺具奏。統乞皇上恩鑒。謹奏。

乾隆二年六月十八日。奉硃批。知道了。欽此。

都察院左僉都御史。署理河南巡撫。臣尹會一謹奏。爲酌請通商運硝。以裨民生。以杜私販事。乾隆二年二月初八日。准工部咨。開。總理事務和碩莊親王等議奏。請除商收硝斤一案。以豫省開歸陳汝四府濱河斥鹵之地。不生五穀。出產硝斤。貧民藉以煎熬。易米度日。向有硝行收買。以備採辦解部。及鄰省購買之用。原督臣王士俊請歸鹽商收買。利歸商人。累貽百姓。行令河南撫臣。仍聽民間設立行戶。自相交易。其鄰省需用。應聽齎批赴買。仍嚴飭留心稽查。不許私販出境等因。奉硃批。依議。欽此。欽遵。在案。臣查豫省硝斤。歸商收買。實爲小民隱累。自蒙恩允。仍聽民間交易以來。殊於貧民有益。臣細察民情。竊欲推廣皇仁。酌量變通行運。以杜私販之源。不揣冒昧。敬陳聖聽。查貧民原係逐日煎熬。隨時售賣。以資糊口。而本省奉部採買。乃偶然之事。鄰省又係約計應用。數目彙齊。委員購買。當其辦買之時。數至累萬之多。一時不易足額。及至買畢之後。則又硝多。無從發賣。向來雖有硝行收買。資本原屬無多。非能常川收積。本完貨足。卽截然不受。更有矚知委員已去。度其爲時尙早。恐積久虧折。措勒不收。貧民因而生計難資。此產硝地方之情形也。硝斤一項。營中合製火藥而外。各處銀匠藥鋪。需用甚廣。鄰省委員購買。盤費

水腳。計算硝價過重。匠鋪向官買用。其費更多。兼之鄰省硝局。多在省城。一省之內。地廣路遠。焉能盡赴硝局。悉費重價買用。價昂則利倍。利倍則私販者自多。此鄰省之大概也。本地之硝行。既不能常川多收。煎硝之貧民。又不能枵腹緩待。於是貧民利私販之濟急。私販利貧民之暗售。而鄰省匠鋪。又利私販之價賤。卽收硝行戶。亦因官買無期。潛結私販。故販硝之禁嚴。而私販愈不能除。猶之從前銅禁愈嚴。而銷燬制錢者愈多。其勢然也。臣愚以爲硝斤。雖可合製火藥。但非硫磺不能成造。而鋪戶之用硝。旣廣且多。利之所在。法固難止。況江浙湖廣等處。均屬內地。又與邊境不同。嗣後應請酌量變通。所有產硝地方。收硝行客。欲運往某處售賣者。聽其稟明州縣官。將硝斤數目。運往處所。關會彼處地方官員。并給與印照。以備沿途查驗。按其程途。計其往返。定限繳銷。彼處地方官。仍將運到日。關覆備案。如無文照。卽以私販論罪。若州縣官吏藉端需索。察出叅究。如此。則收硝行客。旣得持照行運。卽可陸續收買。貧民不致阻抑。生計。暗售私販。而鄰省地方。硝斤通行。無奇可居。私販將不禁而自除矣。營伍合製火藥。卽可就近買用。無須隔省遠購。多費價直。兵丁亦屬有益。各省又免委員之繁。省無益之費。其邊境沿海地方。仍照常查禁。毋許運往。此臣愚昧之見。是否可採。伏乞皇上睿鑒施行。謹奏。

乾隆二年六月十八日奉硃批。總理事務王大臣會同該部議奏。欽此。

都察院左僉都御史。署理河南巡撫。臣尹會一謹奏。爲請動生息餘銀。建設營倉。買貯穀石。以資兵食。以廣皇仁事。竊照督撫鎮標兵丁。前蒙世宗憲皇帝恩賞銀兩。營運生息。惠濟吉凶之需。查河南撫標。

賞銀四千兩。河北南陽兩鎮各賞銀六千兩。南陽鎮係置地收租。河北鎮及撫標係交商營運。從前生息。止將撫標本標出征兵丁給賞。其本標存營兵丁及外營兵丁俱不與焉。是以歷年息銀除給賞之外。撫標標共積存餘息銀二萬一千餘兩。上年因出征兵丁已經撤回。前撫臣富德咨明兵部同存營兵丁一例給賞在案。此後每年所得息銀除給賞之用。餘賸無多。但撫標本標兵丁已得普霑恩澤。其十三外營共馬步兵六千餘名。尙未遍及。若將餘息再爲交商營運。湊賞外營。又恐與地方未便。似宜從長計議。以廣聖主體恤之仁。臣思春月青黃不接之時。及偶遇歉歲。米價較常增貴。兵丁仰事俯育。不無借貸重利之累。若酌動餘息。於秋收後買穀二萬石。約需銀一萬餘兩。按額兵多寡分貯各標營。每年春借秋還。免其加息。則外營兵丁與本標兵丁一體均霑。緩急有濟。頂戴皇仁。永無旣極矣。如蒙聖恩。允所有建倉之費。並請在於餘息內動支。其各營貯穀數目及買穀建倉動用銀兩事竣造冊送部。此項穀石卽令各營經管入於交代之內。是否有當。伏乞皇上睿鑒訓示。遵行。謹奏。

乾隆二年七月初七日奉硃批。好。最應如是辦理者。欽此。

都察院左僉都御史署理河南巡撫臣尹會一謹奏。爲欽奉上諭事。竊臣接准戶部咨。開乾隆二年六月十三日總理事務王大臣奉上諭。禁止燒鍋一事。朕從前降有諭旨。因孫嘉淦條奏。復降諭旨。令王大臣九卿集議。續經兩議具奏。朕又降旨。令其確議。今思禁止燒鍋。及關係民生日用之事。該省督撫大臣所當悉心籌畫者。著將朕屢次所降諭旨。及孫嘉淦所奏。與王大臣九卿等所議。悉行抄錄。交直隸山

東、河南、山西、陝西等省督撫各抒所見陳奏不必會同商酌。欽此。欽遵。該臣看得養民在於足食。足食在於愛惜百穀。而裕蓋藏之原。我皇上軫念民依。重農貴粟。燒鍋一事。上廬宸衷。屢頒諭旨。令王大臣九卿確議。又命北五省督撫各抒所見。仰見大聖人好問好察。執兩用中。伏讀前後綸音。所以爲民生日用計者。至深且切。是必禁之而廣裕積儲。行之而旋見實效。始可仰副聖主愛民之心。惠民之政。若因之而轉失小民自然之利。徒滋紛擾之端。則又非我皇上特申禁令。以期有利無弊之至意也。夫行法宜因乎地。而立禁先清其源。臣謹就豫省地方。詳加體察。爲我皇上陳之。臣查燒酒所需高粱爲多。而中州所植。高粱爲盛。蓋因地土平衍。蓄洩無備。雨水稍多。卽虞淹浸。惟高粱質粗而稈長。較他穀爲耐水。故種植者廣。其稈名曰秫。民間編籬葺屋。織蓆炊薪。莫不取給於此。而黃河兩岸。隄長工險。歲搶二脩。必需秫。糶糶所用。更不可勝計。獨是高粱之爲物。易朽而難於久貯。因用以造酒。資其利。以濟日用之需。相沿既久。習以爲常。而大開燒鍋。輿販射利者甚少。民間取用。惟明流居多。其色類於燒酒。其味稍淡。亦用高粱作成。大概飲燒酒者。十之二三。飲明流者。十之七八。此酒家常率能自造。隨處俱可零沽。幾於比戶皆然。使禁燒酒而不禁明流。則造酒者仍衆。若禁燒酒而并禁明流。則犯禁者愈多。此臣所以再四籌畫。仰體天心。順民之情。因民之利。而不敢遽請嚴禁者也。惟是造酒必需麴蘖。晒麴必用二麥。豫省產糧。惟二麥爲最廣。而耗費麥糧者。莫如晒麴爲最甚。凡直隸、山、陝等省。需用酒麴。類皆取資於豫。故每年二麥登場後。富商巨賈。在於水陸馬頭。有名鎮集。廣收麥石。開坊晒麴。耗麥奚啻數千萬石。臣於到任後。業將禁止晒

麩緣由。恭摺奏明。夫麥乃五穀之精良。非若高粱之質粗而易朽。豫省之民。尤每食必需。耗一分之麥糧。則損一分之民食。若省一分之晒麩。卽裕一分之積貯。是禁麩旣以節二麥之費。更以清造酒之源。臣請嗣後除民間零星製麩自用者。免其逐戶查禁外。其有開張作坊。廣收多晒。囤積販賣者。請旨勅部嚴行定例治罪。并將失察縱容之地方官。定以處分。凡關津隘口。嚴加稽察。如有車載船裝。牲畜馱運。盈千累百。販往各省者。卽行查拏究治。庶幾麥糧歲有餘積。儲蓄日饒。而晒麩不行。則燒鍋亦可漸減矣。他如查禁之難。滋擾之弊。以及棗柿等類之均可燒酒。諸臣業經陳奏。不敢贅瀆。臣謹就豫省情形。遵旨議奏。是。否有當。伏乞聖鑒。謹奏。

乾隆二年七月十七日奉硃批。原議之王大臣議奏。欽此。

都察院左僉都御史。署理河南巡撫。臣尹會一謹奏。爲請給飯食銀兩。修築民隄。以衛田疇。以廣皇仁事。竊查豫省賈魯。雙洎。汝潁。沙渚。淇衛等河。迂迴旋繞。支派不一。每遇夏秋之交。大雨時行。水勢陡長。一時宣洩不及。往往淹及民田。向來民間於河流頂衝湍急之處。築以隄堰。保護田疇。但高者四五尺。低者不過二三尺。且係浮土堆築。並不堅固。故水小之年。尚可抵禦。如今歲六月內。雨驟水急。卽難資捍衛。自應於秋禾收畢。農務空閒之時。令該地方官。查其卑薄虛鬆之處。督令民人。增培高厚。夯礮堅實。庶足爲來歲捍禦之計。臣思民隄。民修。原屬分所應然。但臨河地方。年歲豐歉。各有不齊。民力亦難一致。如地方豐收。食用寬裕。則以衆人之力。爲一方之保障。人旣樂從事。亦易集。若收成少薄之處。餬口維艱。小民

方謀食之不遑。而責以修築隄堰。則枵腹趨事。勢有所難。前因東省麥收歉薄。伏讀上諭。如開渠築隄。修葺城垣等事。酌量舉行。使貧民傭工就食。兼養贍家口。欽此。仰見聖主愛養黎元。無微不至。今豫省臨河州縣間。有被水村莊。收成未免稍減。似應推廣皇仁。酌量辦理。豐收地方之民隄。仍聽百姓自行修築。其被水歉收之處。所有應修隄堰。民力維艱。仰懇皇上格外加恩。每挑土一方。酌給飯食銀四分。加夯礮銀一分。於司庫存公項下支給。如蒙恩允。臣卽飭令地方官。逐一查勘。據實估計。將應用土方銀數。造冊詳報。核實給發。於秋末冬初之際。督率民夫。增卑培薄。層土層礮。以期一律堅固。如此。以民之力。衛民之田。而又給以銀兩。資其飯食。則百姓自必踴躍赴工。不獨隄防攸賴。而貧民亦得以力作度日。感戴聖恩。永無既極矣。爲此繕摺具奏。伏乞皇上訓示遵行。謹奏。

乾隆二年八月十八日奉硃批。好。此係極應如是辦理者。但須嚴察吏胥。務使百姓均受實惠。欽此。

尹少宰奏議卷二

河南疏二

都察院左僉都御史、署理河南巡撫、臣尹會一謹奏。爲請設社學之制、以廣聖化事。竊惟王政莫大於教民。教民莫先於立學。各州縣之有社學、卽古家塾黨庠之遺意也。養蒙育德、所關甚鉅。我國家振興學校、文教覃敷。荷蒙世宗憲皇帝賞發帑金於省會之地、酌立書院。海內人文、蒸蒸蔚起。但鄉村之內、無貧窶小民、艱於脩脯、無力讀書。以致子弟曠廢者有之。伏查雍正元年定例、州縣大鄉鉅堡、俱令設立社學。其社師餼廩、於學租中撥給。所以養育人材者。至周至渥。良法美政、誠萬世所當遵奉者也。臣抵任以來、查問各屬、歷來並無設立社學之處。蓋緣豫省學租一項、止有九百餘兩、除照例酌給貧生外、所餘無幾。以作社師餼廩、實屬不敷。是以因循至今。似應遵照雍正元年之例、酌量建設。查一邑之內、大鄉鉅堡、烟戶稠密處所、本屬無多。臣請大州縣或設三四所、中小州縣或設二三所、每所量給餼廩。於司庫充公銀內支給。令地方官於生員內擇其學優行端者、將姓名報明學政、補充社師。招徠貧民子弟入學肄業。先將小學一書朝夕訓課。自立教明倫、敬身稽古。以至嘉言善行、服習講貫。然後次第授以四書各經。庶養育端而氣質可化。植基正而良材自興。至於稽查勤惰、則責之教官。如社師內有廢弛學規、久無成效者、卽會同州縣詳明更換。其有勤於教導、學業日進者、俟學政按臨之日、據實具報。將社師從優獎勵。

倘州縣教官不實力奉行。卽行叅處。如此。則各屬自必盡心舉行。罔敢視爲具文矣。臣思豫省如此。他省大略相同。倘蒙俞允。仰懇皇上勅令各省督撫。一體舉行。至餼廩數目。動用款項。仍聽各省督撫因地制宜。酌量撥給。將見無地非學。無人不學。匪獨蒙養既正。弟子無曠廢之虞。而且化導有方。閭閻獲敦龐之效。普天率土。共沐聖恩於無既矣。臣言是否可採。伏乞皇上訓示遵行。謹奏。

乾隆二年九月十八日

都察院左僉都御史署理河南巡撫臣尹會一謹題。爲遵旨明白回奏事。竊惟議獄必須按律。而秋審務在揆情。此卽虞廷惟明克允。罪疑惟輕之意也。蓋律有定而情無窮。故從來秋審之案。有外臣擬重。而廷臣改輕者。亦有外臣擬輕。而廷臣改重者。歷難畫一。總期協中。今科臣田懋。奏河南秋審。過於寬縱。荷蒙皇上天恩。不卽將臣交部議處。令臣明白回奏。欽承之下。悚惶無地。伏念臣於秋審時。將按察司隋人鵬呈到招冊。原係細加斟酌。核其情罪。有犯非首惡。或釁起一時。或行兇之時。本非欲殺。或被害之人。本有不合。方擬緩決。或被毆情急。抵格致傷。或傷非致命。或誤傷旁人。或毆妻至斃。尙無兇暴之形。而有不得已之情者。方擬可矜。並非有意寬縱重囚也。但臣於四月二十一日。自京抵豫。適當天氣亢旱。我皇上宵旰焦勞。恤刑疏獄。臣目擊豫省情形。憂心如焚。寢食俱廢。正值辦理秋審。容有揆情核擬。未能允協之處。臣亦何敢固執前見。自蹈愆尤。至按察司隋人鵬。雖公同會審。但例係撫臣核定具題。理合據實回奏。伏祈皇上睿鑒施行。謹題。請旨。

乾隆二年閏九月初七日奉旨。這回奏情節。該部察議具奏。欽此。

都察院左僉都御史署理河南巡撫。臣尹會一謹奏。爲欽奉硃批。據實覆奏事。竊查科臣慧中奏稱。豫省盜風日熾。一摺。接准部咨。例應具題回奏。臣於閏九月初四日。恭疏拜發。茲於初五日。欽奉硃批。豫省盜案。令汝等明白回奏。何尙未至耶。欽此。臣跪讀之下。益深惶悚。臣蒙皇上天恩。畀以巡撫重任。奉命之初。卽聞河南地方。上年歉收。每多盜案。臣於四月二十一日。抵任。卽細加訪察。嚴飭各屬。力行保甲。稽察匪類。拏究窩家。並設立賞罰。責成捕役。實力緝捕。一切墩鋪營汛。俱移咨鎮臣。轉飭各營弁兵。互相守望。不時遊巡。凡遇屬員進見。無不以弭盜安民。毋諱毋縱。諄切告誡。數月以來。報盜之案漸少。報獲之盜甚多。茲據科臣叅奏。乾隆元年題報疎防。止三十餘件。本年正月至八月止。共八十餘件。臣查本年題報疎防。原多於上年。但自正月起。至臣四月二十一日到任之日止。已經前撫臣富德。護撫署布政使臣溫而遜。叅過疎防三十一件。其餘雖係臣陸續題報。而被盜月日。俱在臣未任以前。多係上年十二月及今年二三月之案。至臣任內。報盜而叅疎防者。實止有三件。蓋緣報叅疎防定例。俱以被盜之日。扣限四個月查叅。故被盜在前。而題叅疎防在後。實非近來盜劫日甚一日也。至於南陽等處。所以多盜之故。蓋因南汝一帶。招墾荒地。五方錯雜。且山莊小戶。零星散處。不成村落。是以奸宄易生。又因上年歉收。流寓窮民。生計無聊。卽思爲匪。去冬今春。原多失事。幸自入夏以來。二麥有收。秋成豐稔。報盜之案。已漸稀少。若夫弭盜諸法。如編甲究窩。嚴督兵捕等事。業經多方經理。不遺餘力。臣惟有彌加整飭。以期盜息民安。地

萬寧謐。仰副皇上治益求治之至意。所有臣到任以後。並無盜劫日甚。盜風日熾緣由。理合據實覆奏。再查豫省地方情形。各有不同。如黃河以北。彰衛懷三府。大村鉅莊。室廬相聚。俗尙儉朴。民安耕鑿。盜劫之案。歷來稀少。非必有司之盡能加謹防緝也。其南汝一帶。界連楚省。人鮮土著。又多依田結廬。不能萃處。宵小易生。覬覦加以收成一薄。遂多竊劫。雖有加意防範之有司。亦不能如河北之絕無而僅有。蓋民風有醜頑。歲收有豐歉。其勢固然。但設官治民。豈容因地方之難理。而曲爲寬假。臣是以檢查舊案。雖明知致盜有因。亦不敢稍貸。卽分賊之少。至於斗米尺布。而但有強劫情形。無不題叅疎防者。深慮文武各官。恃無處分。則緝捕愈弛。必致盜賊肆行無忌也。今科臣慧中。乃視題報疎防。爲叅處之具文。而欲以題叅之多。定吏治之廢弛。恐啓天下以諱匿之風。所關尤鉅。又不查明被盜年月。而遽有盜風日熾之奏。以致上廬聖懷。此臣心之更加跼蹐靡寧者也。臣身任封疆。若於奏疏之內。與言臣辨論。恐傷國體。有失和衷之誼。謹再據實奏明。伏乞皇上睿鑒。謹奏。

乾隆二年閏九月初六日。

都察院左僉都御史。署理河南巡撫。臣尹會一謹奏。爲據實陳奏。仰祈睿鑒事。竊查署布政使溫而遜。染於浮滑之習。居心不實。辦理事件。多不認真。卽如今歲豫省間。有被水之西華等處。自應分別撫恤。乃溫而遜以爲大局豐收。遂爾緩視。至今查造冊結。尙未送到。其餘錯誤。難以縷陳。若久在豫省。恐難收臂指之效。理合據實陳奏。伏乞皇上睿鑒。謹奏。

乾隆二年閏九月十三日奉。上諭。溫而遜著解任。來京候旨。河南布政使員缺。著江南鳳廬道范璨補授。欽此。

都察院左僉都御史。署理河南巡撫。臣尹會一謹奏。爲請旨事。竊查豫省廣野平疇。率皆旱地。惟南汝光及衛懷等府州所屬。間有水田。亦屬無幾。然其間亦尙有旱地。可以改作水田者。夫水田之收穫。原較勝於旱地。其因地制宜。導水溉田之處。亦如鑿井灌園。全在百姓自爲經理。而非官法所能督責。惟是小民無知。每以更改水田。旣費工本。而改成之後。卽應照水田陞科。或陞科之後。偶不得水。又難復照旱地之則。是以畏慮不前。伏念我皇上勸課農桑。興修水利。所以籌足食者。至深至切。原欲藏富於民。並非爲增賦之計。相應仰請聖恩。特頒諭旨。將豫省各屬。可以改作水田之處。飭令有司。勸導百姓。因其自種之地。隨其土性之宜。凡有旱地。改作水田者。仍照旱地原額完糧。永不陞科。俾小民知更改水田。利重糧輕。有倍獲之樂。而無加額之虞。自無不踴躍從事。似於水利農田。實有裨益。臣言是否。可採。伏乞睿鑒。訓示。遵行。謹奏。

乾隆二年閏九月二十四日。

都察院左僉都御史。署理河南巡撫。臣尹會一謹奏。爲欽奉上諭。敬陳末議。恭請聖訓事。竊衣食爲生民之至計。農桑實務本之良圖。我皇上軫念民依。重農貴粟。特頒諭旨。明示勸課之方。復命廷臣。詳籌教稼之法。臣伏讀綸音。遵照部議。業已飭令各屬。隨地制宜。因民利導。設立老農。興修水利。實力奉行。惟

是臣生長田間。頗知農務。謹就豫省情形。悉心籌畫。謬抒管見。敬爲我皇上陳之。一天時之宜乘也。凡物之生長。必有其候。故農時以勿違爲先。而力田以早種爲主。蓋早種則先得土氣。根株深固。發生必盛。收成必倍。今豫省百姓。罔知節候。往往有時宜播種而未舉耜者。有時宜耘耔而始播種者。旣失天時。遂違物性。臣查種麥之期。務在白露。如天氣尙暖。當於白露十日後種之。種高粱當臨清明節。種早穀當臨穀雨節。種棉花當在春末夏初。豆子晚穀。則於五月刈麥之後。在麥地播種。蕎麥多種於中伏以內。芝蔴多種於棉花地旁。卽有氣候不同。寒暄各異之處。要必按時下種。不可遲緩。應令地方官刊刻告示。遍戶曉諭。責令老農督率勸勉。仍欽遵聖諭。州縣官不拘時日。輕騎減從。親往各鄉查看。如逾時而未耕未種者。卽詢明緣由。面加訓飭。倘有工本不足者。許老農開具名結。借以倉穀。秋後照例還倉。則天時無失。而耕種得宜。庶百穀繁昌。收穫自豐矣。一人力之宜盡也。南方種田一畝。所獲以石計。北方種地一畝。所獲以斗計。非盡南智而北拙。南勤而北惰。南沃而北瘠也。蓋南方地窄人稠。一夫所耕。不過十畝。多則二十畝。力聚而功專。故所獲甚厚。北方地土遼闊。農民惟圖廣種。一夫所耕。自七八十畝。以至百畝不等。意以多種則多收。不知地多則糞土不能厚壅。而地力薄矣。工作不能遍及。而人事疎矣。是以小戶自耕己地。種少而常得豐收。佃戶受地承耕。種多而收成較薄。應令地方官勸諭田主。多招佃戶。量力授田。每佃所種不得過三十畝。至耘耔之法。又須去草務盡。培壅甚厚。犁則以三覆爲率。糞則以加倍爲準。鋤則以四次爲常。棉花又不厭多鋤。則地少力專。佃戶旣獲豐收。田主自享其利。且分多種之田。以給無田之人。則游

民亦少。仍飭地方官善於奉行。不得抑勒強派。以滋擾累。一樹藝之宜廣也。夫木之佳者。以桑爲尙。其餘如棗、梨、桃、杏、榆、柳、椿、杜等樹。均堪利用。臣查豫省地方。每多鹹鹼飛沙之地。小民因難以墾種。大半荒棄。不知鹽鹼之地。挖去三尺。必無鹹味。飛沙之地。挖去三尺。必有溼氣。而村尾溝頭。離邊屋角。隙地頗多。雖不可播種五穀者。未始不可栽植樹木。似應令地方官責成鄉耆保長。廣爲勸諭。就所宜之木。隨處種植。加意培養。如鄉耆保長有能於一年之內。勸民種桑五百株。梨、棗等樹一千株者。據實冊報印官。給以花紅。三年內能每年添種如前數者。給匾獎勵。則地無曠土。而利賴更溥矣。一女工之宜勤也。竊以蠶桑之利。固屬無窮。而布匹之需。爲用尤廣。查江南蘇、松兩郡。最爲繁庶。而貧乏之民。得以俯仰有資者。不在絲而在布。女子七八歲以上。卽能紡絮。十二三歲。卽能織布。一日之經營。儘足以供一人之用度。而有餘。今棉花產自豫省。而商賈販於江南。則以豫省之民曠廢女工故也。臣愚以爲寸絲之直。可以買尺布。衣布之人。百倍於衣絲。且織布易而織絲難。教以難者。或未必其率從。教以易者。庶可冀其執業。但豫民未嘗不織布。而家有機杼者。百不得一。應令地方官曉諭有力之家。或多造機杼。貸於織布之戶。量取賃直。或將無礙公項。可以動支。打造者。令其報名給領。俟一年之後。繳還原項。并廣勸婦女。凡牌甲之內。有一家織布者。卽令同甲做效行之。久而比戶連村。無不各勤紡織。似亦推廣蠶桑之一道也。以上四條。臣仰體我皇上重農務本。富民足食之至意。竊欲就豫省地方。董率官民。措施辦理。但臣知識淺陋。是否有當。伏乞睿鑒。訓示遵行。謹奏。

乾隆二年十月初三日。

都察院左僉都御史、署理河南巡撫、臣尹會一謹奏。爲請寬河工採辦料物之限。以便官民事。竊豫省河工料物。多需秬稻。向例採辦之時。分別乾溫青三等交收。青者新收秬稻。其性帶潮。以二斤作一斤。溫者其性漸乾。以斤半作一斤。乾者其性已燥。以一斤作一斤。遂有不肖河員。以乾爲溫。以溫爲青。任意折算。殊爲民累。經撫臣富德。飭令八月內交者爲青料。九十兩月內交者爲溫料。惟十一月後交者俱爲乾料。河臣白鍾山。又恐河員舞弊。遂責令地方印官稱收。嚴加查察。民累漸除。臣查採買料物定例。八月內給銀。十月內辦足。但每年八月。雖早秋登場。而霜降未逾。正值大汛之時。道廳各官。修守方殷。奚暇兼顧。且自領銀以至採買。輾轉發收。已在九月下旬。斯時秋禾甫經刈穫。二麥正當播種。漕糧又當交納。人工車畜。俱無閒暇。印河各員。恐干遲延處分。不顧農務之緩急。嚴行催促。以致小民辦運維艱。伏念河工備貯料物。原爲來年桃伏秋汛之用。卽於冬月交工。並無貽誤。今責以八月辦足。限期緊迫。勢有難行。官民交累。況十月以前。料物未乾。稱收折算。弊竇易生。似應仰請皇上。特頒諭旨。嗣後河工每歲應辦料物。俱定限九月發銀。十一十二兩月運送辦足。令百姓務將乾料解交。收料人員。須照十六兩準秤。公平稱收。不得額外加增。任意折算。倘有重秤短價。虧折累民者。嚴叅重處。如此一寬限間。則採辦從容。官免遲延之咎。按期交納。民無急迫之虞。料物愈乾。則虧折自少。稱收畫一。則弊竇難生。不獨無誤工需。而并有裨實用。兩河臣庶。永戴聖恩於無極矣。臣言是否。可採。伏乞睿鑒。訓示遵行。謹奏。

乾隆二年十月初三日奉硃批該部議奏欽此

都察院左僉都御史署理河南巡撫臣尹會一謹奏爲奏明事乾隆二年十月初四日准戶部咨開議覆各省陳奏燒鍋一案行令各該督撫將富商巨賈廣收麥石肆行晒麩大開燒鍋者嚴行禁止違者杖一百枷號兩個月失察之地方官照案處分等因奉旨依議欽此欽遵臣查豫省爲產麥之區向來富商巨賈開張作坊廣行晒麩者甚多臣到任之後卽飭查禁并將應行嚴禁緣由於欽奉上諭事案內恭摺奏請在案今准部文現在通行遵照嚴加稽察務清私燒之源而裕積貯之本但麩之爲物經久不壞愈陳愈佳是以民間仍有累年舊麩存貯未售者今若將舊有之麩聽其照常販賣殊非立法禁止之意若遽將舊存之麩概行嚴禁則商民人等以資本所關勢必深藏遠匿輾轉私售亦難盡絕其根株臣愚以爲欲杜將來之興販必先清舊有之囤藏業已飭令各屬將從前麩行麩坊逐一查明如有舊存之麩令其自行首報半年內陸續賣完不許再行私晒并令鄉地鄰佑一體查報則舊麩不致潛藏新麩無從影射官吏易於稽察私晒自可盡除矣所有禁止晒麩現在遵奉辦理緣由理合據實奏明伏乞皇上睿鑒謹奏

乾隆二年十月二十一日

尹少宰奏議卷四

河南疏三

河南巡撫臣尹會一謹奏爲恭謝天恩事。乾隆二年十月二十四日准吏部咨開。欽奉諭旨。尹會一著實授河南巡撫。欽此。臣隨恭設香案。望闕叩頭謝恩。竊臣質本凡庸。學尤淺薄。恭承簡命。署理封疆。半載虛糜。寸長未効。屢蒙聖訓。正感奮之交深。復荷恩綸。實驚懼之並集。任益專而責彌重。報稱爲難。才有限而心無窮。惴忱自矢。念巡撫爲百僚之率。首在賢否之能明。而河南爲四達之衝。尤貴措施之悉協。課農興利。須因地以制宜。除暴安良。必隨時而致慎。以臣自揣固陋。何堪上副聖明。惟有倍加努力。勉竭愚誠。明發存不寐之懷。夙夜懷匪懈之義。務期整飭吏治。休養生民。以仰酬我皇上知遇之隆恩。於萬一所有微臣感激下忱。理合恭摺奏謝。伏乞皇上睿鑒。謹奏。

乾隆二年十月二十六日

河南巡撫臣尹會一謹奏。爲據實覆奏。請旨遵行事。竊臣前與侍郎臣趙殿最等會勘輝縣百泉。查有水田改作旱田之處。恭摺奏明。俟秋收後。確勘實數。請旨。欽奉硃批。知道了。欽此。臣隨飭司檄委新鄉縣知縣張鉞。祥符縣主簿王元慈。逐段丈勘去後。茲據署布政司胡紹芬詳稱。輝縣百泉。爲衛河之源。向來建有仁義禮智信五閘。兩旁治爲水田。地勢有高下之不同。得水有遠近之各異。是以完糧有照旱地。

額則每畝完銀六分一釐零者。有每畝完銀九分二釐及一錢八分四釐零者。照額輸將。歷來已久。嗣因衛河淤淺。漕船阻滯。於雍正四年間。改築官民三渠。挖取渠內之土。修築隄岸。因致渠深地高。近聞之兩旁地畝。難以得水。故有改作旱田之處。今勘得通共水田一百六十一頃四畝零。內除田一百四十二頃一畝零。現在得水。及不得水田六十五畝零。每畝完銀六分一釐。額糧本輕。毋庸置議。惟不得水而額糧又重之田。共十八頃三十六畝七分零。照該縣旱地額則。每畝完銀六分一釐。共應減免銀一百六十六兩八錢二分零等情。臣查水田糧則原重。既經勘明。委係渠深地高。難以得水。改作旱地。應請皇上天恩。將不得水地十八頃三十六畝零。減免銀一百六十六兩八錢二分。令民間每畝悉照折中行糧完銀六分一釐。以紓民力。仍嚴禁胥吏。不得高下其手。浮派私徵。則輝邑士民。咸戴聖恩於無既矣。臣謹據實繕摺奏請。伏乞睿鑒。訓示遵行。謹奏。

乾隆二年十月二十六日。部議。應如所奏。以廣皇仁。出示曉諭。務使均沾實惠。奉硃批。依議。欽此。

河南巡撫。臣尹會一。謹奏。爲欽奉上諭。酌議覆奏事。竊惟足民莫先於籌食。而良法莫亟於除弊。國家設立常平倉。平糶以濟民食。買補以備積貯。誠萬世不易之良規。而有司奉行不善。弊竇百出。荷蒙聖明遠照。洞悉靡遺。特頒諭旨。令各省督撫。將如何籌畫辦理。使官民無累。而蓋藏常足之處。悉心定議具奏。仰見聖主優恤臣民。慎重倉儲之至意。臣敬釋欽遵。詳加籌畫。謹就豫省情形。謬抒一得。爲我皇上陳之。伏讀聖諭。出糶之時。附城居民就近赴買。而鄉民則往返守候。不能遍及。蓋緣一邑之內。地方遼闊。而

運米至鄉。必需腳價。此項費用。無從支給。地方官又難賠墊。是以因循舊例。止在關廂附近出糶。而鄉民距城遙遠。往返守候。動需時日。實未周遍。臣請嗣後平糶。在城關廂照舊糶賣。再於大鄉大集。擇道路適中之地。量州縣地方之大小。或設二三廠。或設四五廠。預先運米至鄉。酌定日期。遍行曉諭。挨次輪流出糶。每糶過一處。即將所糶地方日期。及價值穀石數目。據實通報上司查考。其搬運至鄉腳價。照賑穀運鄉之例。准於糶價內。據實報銷。如有浮冒。該管上司。卽行揭叅。如此。則鄉僻窮民。得以就近赴買。均沾實惠。而無遠涉守候之苦矣。又聖諭。城中矜戶。役戶。牙戶。囤戶。與倉書聲氣相通。捏名報買。而州縣之內。丁隨役。亦乘機暗竊。通同盜賣。夫內丁隨役。通同盜賣。固亦事所常有。該管官若能親身赴廠。稽查彈壓。若輩自不敢公然偷盜。但州縣一官。刑名錢穀。事務殷繁。往往不能兼顧。而所委監糶之人。非親卽友。亦難保其無弊。臣請嗣後平糶。遠在鄉村。印官一身不能分顧者。在州則有州同州判。在縣則有縣丞或巡檢。教職等官。令其分查彈壓。如有侵盜米穀。或失於覺察。或徇隱不報。事發。將地方官及監糶之佐貳等員。一併叅處。至杜絕衿役牙囤。捏名報買之弊。莫如諭令居民。各帶門牌。赴廠驗糶。約以五日一次。每口一斗爲率。蓋各戶門牌。凡大小名口數目。以及作何生理。俱於編查保甲時。填註明白。如矜戶。役戶。牙戶。及有力之戶。一覽可知。今持此驗糶。捏名自少。而又酌量戶口之多寡。不許多糶。則囤販亦難。此豫省已行之法。頗有成效。似應照舊奉行。旣以官長以稽察。又有門牌以查驗。盜賣販囤之弊。自可剔除矣。又聖諭。買補之際。往往擇縣中富戶。發給銀兩。令其交穀。有照時價短發十之一二者。有銀色低潮者。或令自運。

還倉脚費無出。又或用斗則以大易小。用秤則以重易輕。交倉折耗。盤倉供應之費。皆出之小民。更有照糧派買之弊。每處派一買頭。總斂各戶。照數交倉。臣查買補穀石。短價潮銀。大斗重秤。浮收折耗。勒索供應。久經例禁。近今以來。州縣苟非奇貪不肖。亦頗知恪遵功令。不敢仍蹈陋習。惟派買運交之弊。尙恐未能盡除。蓋緣買補倉穀。盈千累萬。勢必四散採買。動需腳價。且北地陸運。所費尤多。雖定例。准於買穀羨餘銀內開銷。但天時豐歉靡常。穀價低昂難定。設遇價昂。卽無羨餘。誠如聖諭。不能無賠累之苦。則官吏不能不問之閭閻。或派富戶。或派里民。輓運交送。滋累實多。前因本地買穀。有派買短價等弊。定例。令於鄰近州縣購買。雖屬杜弊之一法。然或本地價賤。而必向鄰邑遠求。既費錢糧。又多跋涉。殊爲未便。臣請嗣後採買穀石。無論本境鄰邑。總視穀價之貴賤爲準。有需車船運送之處。自行雇備。准於羨餘銀內開銷。如無羨餘。准於別邑羨餘銀內撥給。至該州縣。或遇價直昂貴。原糶價銀不敷。仍照例。將別處盈餘銀內通融撥補。如果年歲歉收。本地鄰邑。價俱昂貴。卽查該處及附近州縣。倉儲充實。將存價緣由咨部。俟次年秋收買補。並責令該管府州。就近督察。倘有派累富戶里民。採買運交及短價浮收等弊。將地方官嚴叅治罪。該管府州。一併叅處。總之平糶之時。則運之四鄉。以廣其惠。責之官吏。以稽其弊。買補之際。則按道里之遠近。給以腳費。照時價之貴賤。核實支銷。經費悉出公帑。官無賠墊之虞。採買既屬從容。民無派累之擾。蓋藏自足。積貯常盈。普天臣庶。共沐聖恩。於無旣矣。臣謹遵旨覆奏。伏乞皇上睿鑒。謹奏。

乾隆三年二月初五日。部覆。應如所奏辦理。奉硃批。依議。欽此。

河南巡撫。臣尹會一謹題。爲仰請聖恩。增設先儒博士事。竊惟唐儒韓愈。宋儒范仲淹。學貫天人。詣兼體用。攘佛斥老。闢異教以遵經。後樂先憂。引天下爲己任。推孟氏以原道統。源流溯列聖之傳。勛張子以授中庸。理學啓關中之盛。均足扶持乎名教。覺世牖民。實堪維繫於古今。守先待後。雖兩廡從祀。已邀俎豆之榮。而世澤未衰。尙冀褒崇之典。今懷慶府之孟縣。河南府之洛陽縣。韓愈范仲淹之墓在焉。昌黎之嫡派。一綫猶存。參政之裔孫。旁枝蕃衍。據布政使范琛查明。韓愈三十代孫韓法祖。范仲淹二十一代孫范君建。俱係讀書自好。立品端方。按照周程張朱之例。取具冊結圖誌。呈請添設博士前來。臣覆查韓愈當異學爭鳴。墜緒茫茫之日。獨能旁搜遠紹。肩任道統。實爲有唐一代大儒。至范仲淹。一生事業。悉本聖賢。故先儒論宋朝人物。無不推爲第一。此二儒者。似應援照周程張朱之例。仰請聖恩。增設博士。以昭曠典。伏乞皇上。睿鑒施行。謹題。請旨。

乾隆三年三月十二日奉旨。該部議奏。欽此。

河南巡撫。臣尹會一謹奏。爲灘地區號編畫已竣。恭摺覆奏。仰祈睿鑒事。竊查黃河南岸灘地。坍塌不常。從前雖有通融撥補之例。而界址未清。一遇坍塌。無憑查考。坍者則以少報多。漲者則以多報少。互相隱混。每起爭端。經臣於上年閏九月內。將畫區編號。清理灘地緣由具奏。欽奉硃批。知道了。妥協辦理可也。欽此。臣隨檄催沿河各州縣。於去冬汛水消退之後。將河灘地畝。逐一查明。自隄根起至河邊止。挨次編號。畫爲方區。每區以五百四十畝爲率。其畝數不足者。卽爲零區。四圍封立土墩。栽植桑柳。以爲經

界按照畫區造具細冊於冊首繪具一圖凡道路村莊溝渠等類一併繪列再將業戶地畝開明段落四至及某號某區字樣登註冊內總期圖冊相符瞭如指掌每區擇其地畝多者爲區頭其所造冊籍一樣兩套一存州縣一付區頭收執又於每號中設公直一名專司查丈每年酌給灘地租粒以資口糧至灘地糧銀飭令各州縣另立冊籍徵收以杜混冒今沿河各區號業已一律編畫完竣嗣後遇有坍漲令業戶報明有司督同公直查丈明確卽於冊內增除詳報倘有侵佔訐訟者取冊查驗虛則懲處如此則區號既有一定經界不致混淆冊者隨時撥補貧民無賠糧之虞漲者按畝報陞奸民無隱佔之弊地畝均平爭端永杜息事寧人於官民俱有裨益理合覆奏伏乞聖鑒謹奏

乾隆三年三月十八日

河南巡撫臣尹會一謹奏爲欽奉上諭事乾隆三年三月二十三日接准大學士伯鄂爾泰張廷玉字抄奉聖旨一道以河南雨澤應時二麥可望有收令臣就近酌量作何勸導辦理俾米麥流通接濟鄰省寄信前來仰見聖主軫念民依籌畫周詳無微不至臣查直豫兩省緊相接壤之處水陸舟車往來直達絡繹販運並無阻滯將來二麥登場市價必賤誠如聖諭鄰省亦可賴以接濟臣欽遵諭旨多方勸導並將天津臨清等關米船免稅之處廣爲宣布俾來豫糴買者四方雲集自豫販往者踴躍前行商販流通源源相繼以仰慰聖懷於萬一臣又有請者直豫界連採買本屬易事但恐漁利之徒一聞鄰省專員採買勢必爭先囤積而奸牙人等居奇擡價故意留難委員急於購買不得不增其價直必致多費帑金

卽如上年督臣李衛。委員至豫買米。雖經臣嚴行飭禁。而市價未減。採辦需時。此明驗也。伏念直、豫民人。同爲朝廷赤子。直、豫帑項。均屬國家錢糧。與其直省齎銀來豫。購辦維艱。何如豫省分縣買收。經理尙易。今接壤之河北三府屬。二麥秀實。四月中旬。卽可刈穫。臣一面札商督臣李衛。一面動支藩庫正項銀兩。分發各屬。在於附近水次地方。照依時價。約略買麥十萬石。以便直省委員領運。如尙不敷。查有應還民借倉穀。麥收之時。恐小民隨手花消。逋欠難完。現飭以麥抵穀。折算還倉。此項麥石。亦可運濟。至各縣麥石。運赴水次。應需腳價。卽照上年運米赴陝之例支給。事竣一併核實報銷。如此。則豫民無居奇之弊。直省免採買之煩。市價可平。民食自裕。一轉移間。似有裨益。是否有當。伏乞皇上。訓示遵行。謹奏。

乾隆三年三月二十七日奉硃批。汝能如此。竭力辦理。甚佳。卽商之李衛。彼必以爲是也。欽此。

河南巡撫。臣尹會一。謹奏。爲請增陋麪之例。以裕民食事。竊查豫省。素稱產麥之區。凡本地大賈。外來富商。每於二麥登場之候。挾其厚貲。於馬頭集鎮。廣收麥石。肆行陋麪。陋成之日。盈千纍萬。販運他省。售與燒鍋之戶。不獨耗本省之麥石。而并以損外省之民食。爲害最大。誠如聖明洞鑒。斷宜嚴禁重懲者也。臣前於欽奉上諭事案內。議請查禁。奉准定例。廣收麥石。肆行陋麪者。杖一百。枷號兩個月。失察之地。方官。每案降一級留任。失察至三案者。降三級。卽行調用。業經通行。遵照在案。臣愚以爲欲杜耗穀之源。陋麪不可不禁。欲遏陋麪之流。販運尤不可不嚴。蓋麪非輕巧之物。陋非秘密之事。工作必多其人。製造必有其具。其需用之麥。非擔石之所能爲。其收藏之地。非篋笥之所能匿。故陋麪之家。鄉地保長。斷無不

知而彼此串結。互相容隱者。非瞻顧情面。卽受其賄賂。至運往他省。大抵車載船裝。牲畜馱負。牙行經紀。爲之交易。車戶船家。爲之運送。但於關津隘口之處。嚴行盤詰。自難隱漏。臣已嚴飭各屬。如有開張作坊。肆行晒麩者。許鄉地保長。赴官密稟。牙行經紀。車戶船家。不許代爲交易運送。關津隘口。一體稽查。拏獲之日。量行給賞。經過失察之地方官。分別記過。去冬以來。盤獲販麩之案頗多。奸民漸知斂跡。不敢公然晒販。但目下轉瞬麥秋。誠恐嗜利奸商。仍蹈前轍。雖經飭禁。若非仰請皇上。定例遵行。勢必日久漸弛。肆行晒販之弊。不能保其盡絕。民食攸關。殊非淺鮮。臣請嗣後民間製麩自用。爲數無多者。仍免查禁。如有廣收麥石。開坊晒麩。至三百斤以上者。本人照例治罪。鄉地保長。徇隱不報。事發照賭博總甲之例。笞五十。販運麩塊之人。至一百斤以上者。照違制律。杖一百。牙行經紀。車戶船家。代爲交易運送者。照不應重律。杖八十。關津隘口。一體查拏。如有隱漏出境者。經過失察之地方官。每一案罰俸六個月。官吏人等受賄故縱者。照枉法律。計贓論罪。所有麩塊。發與本地鋪戶。爲製造黃酒明流之用。仍將變價銀兩三分之一。給賞報獲之人。如此。則勸懲有方。查拏自謹。販運嚴而售買自少。售買少而私晒漸無。留麥穀之有餘。裕蓋藏之本計。於民生似有裨益。是否有當。伏乞皇上。訓示遵行。謹奏。

乾隆三年三月二十七日。奉硃批。該部議奏。欽此。部覆。毋庸議。奉旨。著照巡撫尹會一所請行。欽此。河南巡撫。臣尹會。一謹奏。爲恭報二麥收成分數。仰祈睿鑒事。竊豫省自二月以來。甘霖疊沛。大澤均霑。是以二麥倍加茂盛。籽粒倍加堅實。高原下隰。咸獲有收。連日更喜天氣清明。收穫甚便。二麥俱各

登場。櫛比崇墉。村村相望。年老居民。咸稱數年以來。未有之豐稔。據開封等十府三州所屬。將收成分數。呈報前來。臣逐一細核。合計通省十分九分者十之六。八分七分者十之四。理合分晰繕摺。恭呈御覽。謹奏。

乾隆三年四月二十日。奉硃批。以手加額。覽之。欽此。

河南巡撫。臣尹會一。謹奏。爲奏聞事。竊查乾隆元二兩年。春月出借常平社倉等穀。原應於乾隆二年秋後還倉。惟是上年各屬。有因雨水失調。秋成稍薄。無力完納者。有秋禾雖屬有收。而因元年被災之後。元氣初復。未能全完者。據各州縣詳請。緩至今年秋後催還。經臣批准在案。今河南地方。仰賴聖主至誠至敬。感召天和。春霖疊沛。二麥普收。又蒙我皇上軫念民依。嚴禁躪麴。則所留麥石。更爲有餘。第恐愚民無知。不加撙節。任意糶賣。隨手花銷。不獨倉貯虛懸。而民欠漸多。久則益難完納。茲據布政司范璨。糧儲道黃叔瓚。詳稱。元二兩年未完常平。漕社等穀。共二十六萬一千七百餘石。准其以麥抵穀。折算還倉前來。臣查豫省民食。以麥爲主。故有一麥抵三秋之諺。茲當二麥豐收。以其有餘。抵還舊欠。在小民自樂輸將。而多收麥石。以實倉廩。尤爲有備。且徵還之後。并可接濟鄰省。是以臣前於直省買麥摺內。業經附奏。隨飭令照依麥穀時價。公平折算。准其以麥抵穀。徵收存貯。間有民力不敷之處。仍聽其秋收還穀。至於麥多價賤地方。查有存留平糶穀價。并飭酌量糶麥抵補。俾銀米均平。不致穀賤傷農。統俟秋成之後。同徵收麥石。一併易穀還倉。似於國儲民生。均有裨益。謹將辦理緣由奏聞。伏乞聖鑒。謹奏。

乾隆三年四月二十日奉硃批。如此通盤籌算甚佳。欽此。

河南巡撫臣尹會一謹奏。爲據實覆奏。仰祈睿鑒事。竊臣前將武陟等縣蝻子撲除緣由具奏。欽奉硃批。知道了。蝗蝻之萌生。實可以人力勝之。若視而不急行撲治。則爲患莫大焉。欽此。仰見我皇上聖明洞照訓示周詳。伏查武陟獲嘉及續報之鞏溫淮蔡等處。雖有蝻子萌動。而羽翼未生。易於撲治。臣一聞稟報。卽委標下弁員督同文武各官。廣集人夫。多掘深溝。順風驅掃。火燒土埋。有四散逸出者。令鄉民細加搜捕。計升給錢。當卽撲淨無遺。臣又考古者八蜡之祭。索饗萬物。歲報順成。載在禮經。後世遂因蝗祀蜡。由來舊矣。我國家昭事神祇。典禮明備。而河南省城向無蜡祀。經臣與司道等公同酌議。建立廟宇。報本反始。以重田功。現已告竣。而通省所屬亦皆次第修築。享祀弗替。今蝻子之生。撲除甚易。禾稼無傷。百姓人等又莫不感頌聖德。頂戴神庥於無旣矣。合併奏聞。伏乞睿鑒。謹奏。

乾隆三年五月十一日奉硃批。知道了。欽此。

河南巡撫臣尹會一謹奏。爲奏聞事。本年六月初三日。布政司范琛到豫。轉傳諭旨。買麥一事。須竭力相幫。越早越好。欽此。查此項麥石。接濟直省。最關緊要。臣前奏明奉旨之後。卽飭司動帑採買。并委河北道張受長就近督理。昨於五月二十七日。據張受長稟稱。各屬收買已有五萬餘石。臣思買麥十萬石。爲數旣多。若俟買完交兌。未免濡遲。兼恐船隻一時不敷應用。今擬分作兩次運解。則收兌管押辦理從容。而輓輸尤速。業於五月三十日。飛咨督臣李衛。委員來豫。先將五萬石運回。其餘麥石。現在上緊收買。

月內亦可全數起運。理合奏聞。伏乞聖鑒。謹奏。

乾隆三年六月初三日奉硃批。如此辦理。甚好。欽此。

河南巡撫臣尹會一謹奏。爲奏聞事。竊豫省買麥十萬石。接濟直省。前經臣將收買一半。及分作兩次運解緣由。奏明在案。茲於六月十八日。買麥十萬石。全數完足。臣一面飛咨督臣李衛。迅飭委員接續領運。一面檄行署河北道張受長。將各縣所買麥石。逐一派撥停當。各就附近水次。星速運齊。並委同知通判等官。管押監看。面同直隸委員。交收清楚。以便隨兌隨運。不致稽遲。除用過價銀運費等項。另行造冊題銷外。所有豫省採買麥石全數完足緣由。理合繕摺具奏。伏乞睿鑒。謹奏。

乾隆三年六月二十五日奉硃批。此事汝等辦理。殊屬可嘉。欽此。

河南巡撫臣尹會一謹奏。爲敬陳伏牛、大隗、兩山險要情形。酌議巡查防守事宜。仰祈睿鑒事。竊臣蒙皇上天恩。畀以封疆重任。刻刻以弭盜緝匪。奠安閭閻爲念。凡地方之形勢。山川之險易。莫不密訪詳察。務期措置得宜。茲查有伏牛山。起自南陽府之南召縣。跨越河南府之嵩縣。汝州之魯山縣。陝州之盧氏縣。緜亙八百餘里。南通三楚。西接秦中。峭壁懸崖。山深谷邃。人烟稀少。樹木陰翳。最爲險僻。又有大隗山。坐落許州府之禹州。密縣二境。界連新鄭。登封。雖遠隔伏牛山。而紆迴鳥道。亦有徑可通。且距嵩山甚近。萬壑千重。林深箐密。其中燒灰炭。砍木植。採木耳。創藥材之人。又皆棚居穴處。蹤跡無常。奸良莫辨。苟非立法防查。恐有盜賊爲害。前經臣檄飭司道委員入山確勘。妥議。茲據司道等議詳前來。臣覆查伏牛

一山界連數邑。地方遼闊。印官事務殷繁。難於兼顧。惟巡檢一官。原爲巡緝而設。今南召之李青店。嵩縣之舊縣。盧氏之朱陽。均設有巡檢管轄。惟魯山縣正西一帶。深山遙遙。三百里中。並無一官彈壓。考之前明成化年間。原於歇馬嶺設有巡檢。我朝尙載有職名。其裁於何時。年久無憑。查考今議。該縣之趙家村。爲伏牛山適中之地。頗爲扼要。應請設立巡檢一員。弓兵三十名。令其彈壓。每月帶領弓兵入山巡查一次。各縣印官。每季移會駐防汛弁。各帶民壯兵丁入山巡查一次。兼轄之武職。亦每季入山巡查一次。該管道員。照例每年入山巡查一次。如訪有匪類盜窩。立即擒拏究治。至在山之棚民窰戶。仍遵例責令山主人等。附入門牌一體稽察。至於大隗山。處四州縣之中。界址交錯。且聯絡衆山。路逕不一。而禹州之白沙鎮街。密縣之平陌村。新鄭之孫家河。均係入山要道。應各酌建墩臺營房。并派撥馬步兵丁。以資防守。印捕汛弁。按兩月巡查一次。其武職道員巡查之例。悉照伏牛山而行。如此。則出入要隘之地。既有駐防之官兵。深巖窮谷之中。時有巡查之員。弁奸匪斂跡。宵小潛蹤。庶幾山境肅清。而地方寧謐矣。所有魯山縣添設巡檢弓兵。應需衙署俸工一切事宜。及禹州等三縣應建墩臺營房間座。派撥兵丁數目。俟奉俞允之日。臣再另議具題。謹先繕摺陳奏。伏乞皇上訓示遵行。謹奏。

乾隆三年七月二十七日奉硃批。九卿議奏。欽此。

尹少宰奏議卷五

河南疏四

河南巡撫臣尹會一謹奏爲遵旨議奏事。乾隆三年七月初八日。准戶部咨開。欽奉上諭。養民之道。莫要於積穀。積穀之道。必先去其耗穀者。是以前年有禁止燒鍋之旨。後因內外諸臣議稱。用酒之人。比戶皆然。一時驟禁。不無滋擾。不若禁止造麴。其事簡而易行。朕思移風易俗。自當行之以漸。禁麴之舉。正屬漸次轉移之法。恐各省督撫視爲具文。今春特再申飭諭。期於實力奉行。乃尙書孫嘉淦復又奏稱。禁麴之事。多有未便。著直隸、山東、河南、江南、陝西、山西各省督撫。悉心妥議。毋得以朕會降諭旨。稍有迎合。亦不必瞻顧。孫嘉淦遷就依違。務期乘公熟籌。於民生確有裨益。不負朕拳拳咨詢之意。欽此。欽遵。并抄錄原摺到臣。仰見聖天子廣諮博採。兼聽並觀之至意。臣祇聆欽承。敢不詳籌熟察。謹就豫省情形。悉心妥議。敬陳睿鑒。伏念酒爲耗穀之物。麴乃造酒之原。我皇上廬念民食。禁止晒麴。此誠端本澄源。潛移默化之道也。豫省自奉行以來。已經一載。官民相安。並無滋擾不便之處。蓋緣北方糧食。以麥爲上。從前未經禁麴之先。小民止顧目前。罔知遠慮。當二麥登場。卽儘數糶賣於麴行。銀錢到手。任情浪費。未至秋成而已無餘儲。於是向之減價以糶者。後復倍價而糶。民力因之日詘。今晒麴禁而食用之餘。蓋藏不至立匱。此卽現在已徵之成效也。雖麥性難於久貯。物理固然。但一二年之間。卽變爲霉灰者。係指潮溼之麥。

而言。若曬晾如法。原可以貯三四年。至官買之麥。或秋後易穀。或來春糶借。又無久貯受累之事。況河南地居天中。四方商賈絡繹不絕。凡水陸可通之地。無不車載船裝。往來販運。設有麥多價賤之處。則富商巨賈挾其厚貲。皆得以圖販麥之利。而農民亦樂其相通。故自禁麩以來。閭閻之婚喪服食如故。百姓之完糧納稅如故。熙熙皞皞。各安其業。此豫省實在之情形也。且夫晒麩之禁。原係通行各省之定例。如果有富商巨賈肆行晒麩者。何地不應查拏。不僅一省爲然。雖民間零星造用。本不禁止。然卽家自爲造。戶自爲用。爲數終亦有限。較之囤販射利。所存實多。至於麥貴之鄉。一切糧食。必無不貴。人卽甚愚。斷未有舍饕殮之急。而先爲麩藥之謀者。是麥賤之地。既不敢多晒。麥貴之地。又不能多晒。則禁麩之令。並非勢有難行者也。我朝休養生息。戶口日繁。普天率土。莫不倍盛於往時。卽歲歲豐收。而三年之耕。猶恐無一年之蓄。且就一鄉一邑而論。其間富民積麥者。不過十之一二。每年僅足食用之。戶不過十之二三。其餘無田耕種。并百工技藝之輩。赴集買食者。不下十之五六。是以本地之麥。通融於本地之人。尙未必家家足食。又何至積之過多。無處售銷。任其霉變而無用乎。卽如今歲。二麥普獲豐登。而現今麥價。已較前漸增。故各屬民欠倉穀。准其以麥抵還。本爲便民起見。而紛紛請緩者尙多。徵納不前。可見豐收之歲。禁麩之時。猶然麥不覺多。價不遽賤。若再弛麩禁。則盈千壘萬。耗散益廣。通省而計。歲費麥糧。寧止數十萬石而已。以數十萬石之麩。而運之各省。則燒鍋造酒者。所費又奚啻數百萬石。與其以數十萬石之麩。糜各省無限之財。何如留數十萬石之麥。爲民間接濟之用。此其得失利害。有判然可決者。夫天下事。有一利

卽有一弊。奉行不善。或不免有擾累之處。全在督撫大吏。嚴飭有司。約束胥役。毋任借端滋擾。務期實力奉行。則立法庶可以杜弊。未可以因弊而廢法。至豫省所行者。乃禁麩之販運。非禁麥之販運。查麩之囤積。非查麥之囤積。事判兩途。更可無庸置議者也。總之。王道固本乎人情。而治體尤權其輕重。民食攸關。非同細故。法行以漸。業有明徵。當此禁麩已著成效。農民相習而安之時。正轉移風俗之大機。豈可徇一時之姑息。忘久大之宏圖。顯以耗民生日用口食之需。陰以導天下奢靡放僻之漸。而至於無所底止哉。臣與同城司道府等。秉公商酌。意見相同。所有豫省禁麩於民生確有裨益。並無不便之處。應請乃照前例禁止。臣謹據實覆奏。伏乞聖鑒。謹奏。

乾隆三年七月二十七日。奉硃批。大學士會同九卿議奏。欽此。大學士九卿定議。督撫各就風土人情。詳籌熟酌。較之懸揣臆度者不同。應均如所請行。奉硃批。依議。欽此。

河南巡撫臣尹會一謹奏。爲欽奉上諭。據實覆奏事。乾隆三年十二月初四日。准戶部咨開。欽奉上諭。本年夏間。江蘇巡撫楊永斌奏稱。禁止晒麩一事。臣已委員協同查禁。其造麩器具。分別封貯拆毀。所有未奉上諭禁止以前。已經造成陳麩。現飭封貯等語。朕比時以楊永斌辦理不善。特頒諭旨。嚴切曉諭。諒各省督撫。悉已聞知矣。今聞河南地方。封貯造成之陳麩甚多。商民從前所用之工本。悉皆委棄。頗有怨言。不知尹會一何以見朕諭旨。尙如此辦理。可傳旨詢問之。欽此。欽遵。臣跪讀之下。不勝惶悚。竊惟足食所以養民。耗穀莫如晒麩。是以肆行晒販。民有治罪之條。失於稽查。官有處分之例。此誠我國家崇本

抑末。易俗移風之要道也。查河南素稱產麥之區。遂有山西富商大賈。挾其厚貲。乘麥收價賤之時。在於馬頭集鎮。廣收麥石。開坊晒麩。每商自數十萬。以至百餘萬。塊不等。車載船裝。販運他省。是豫省之麩。實爲各省之用。而豫省之晒麩。卽關各省之燒鍋也。故各省督撫諸臣。因地制宜。立法不同。而皆以晒麩爲當禁。凡關津渡口。無不嚴行稽查。以防越販。而豫省麩商。又因晒造陳麩甚多。禁止之後。各省處處查拏。在商人旣不能公然販運。而工本所關。若概行禁絕。亦非恤商之意。臣是以再四籌畫。飭令在於本省各屬。四散售賣。并給以照票。俾沿途不致遏禁。從未有封貯麩塊。委棄商本之事。此皆歷有案卷可據者。臣又慮陳麩驟難賣完。并將寬限緣由。奏明在案。伏思立法當籌其利害。而治體必權其重輕。害重利輕。固不可徇利而滋害。害輕利重。又不可因害而廢利。我朝休養生息。百年於茲。生齒日繁。戶口日衆。卽歲歲豐登。而地之出產有數。人之食用無窮。況燒鍋造酒。並非朝夕饕餮所必需。更不可任其糜費。而委美利於無用之地。卽如今歲。豫省汝光南鄙間。被偏災。直隸江南。亦皆歉收。商販民糴。絡繹搬運。且直省接濟之麥。已有十萬石。江南採買之糧。又有三萬餘石。然而豫省民情安靜。猶可支持者。實皆禁麩之所留餘。則爲利實鉅。至於從前陳麩。不過西省數商。囤積之物。旣免其治罪。而又爲之設法疏銷。旣給以照票。任其運行。而又寬以期限。聽其售賣。現在各屬銷賣之數甚多。卽如祥符。已銷過陳麩一百六十四萬餘塊。如果封貯。則此項麩數。何以得售。其餘所存。亦不過稍遲時日。而新麩旣禁。陳麩之價日昂。則本利自在。亦必無委棄之理。我皇上日月同明。無微不照。臣亦何容置喙。惟是人情可與樂難。成與圖始。而嗜

利奸商。尤爲貪心無厭。見小欲速。當其晒麴之時。原欲販運於各方。及至定例以後。止許售銷於本省。遂藉口封貯。交相騰謗。希冀官吏不便查拏。法度因之中阻。以逞其射利營私之計。古來興浮議以撓大政者。莫不皆然。則其攸關於治體者不小。臣仰荷聖恩。至深極重。雖明知此輩易有怨言。然必恪守定例。而但令其本省售銷者。誠恐越販之端一開。勢必以新作陳。暗地私晒。夾帶影射。弊竇百出。則是有禁之名。無禁之實。顯以耗本省數十萬石之麥。陰以損各省數百萬石之糧。利害得失。輕重懸殊。此臣之所以熟思審處。而終不敢依違遷就。徇數商自私之小計。而忘民生日用之本圖者也。所有臣辦理陳麴。並未封貯之處。理合據實覆奏。伏乞睿鑒。謹奏。

乾隆三年十二月初六日奉硃批。九卿詳議。具奏。欽此。

河南巡撫臣尹會一謹奏。爲奏聞事。竊查開封府屬之陳留縣。濱臨黃河。率多坍荒。民間田土。不分等則。每畝徵銀五分八釐零。康熙十五年間。因查丈地畝。不符原額。承辦之員。遂另換短小鐵尺。減縮弓口。每頃報增一十六畝。通邑共加派地一千四十頃有奇。民間以虛地包糧。歷年賠墊。殊爲苦累。又陝州所屬之閩鄉縣。其上則好地。每畝徵銀一錢二分四釐零。沙地及更名地。每畝徵銀一錢六釐零。查豫省糧額。雖各處科則不同。大約每畝不過徵銀五六分。其有徵至一錢以外者。通省無幾。原屬最重。然或地本膏腴。收成較厚。或折畝行糧。弓口甚寬。今閩鄉一邑。土帶沙性。本係瘠薄。而按畝派徵。又非折算。且與接壤之靈寶縣同一地畝。而靈寶上地。每畝徵銀一錢一釐。中地。每畝徵銀八分八釐。彼此相較。閩鄉每

畝又多銀二分三釐。以至一分八釐不等。是於糧額均重之中。尤爲獨重。該縣界連陝省。緊接潼關。最爲隘要。而地瘠民貧。額徵又重。雖遇豐年。亦無起色。伏念我皇上視民如傷。保民若赤。閭閻疾苦。無不周知。今陳留、閩鄉二邑。一則畝小糧浮。一則地瘠糧重。臣身任地方。何敢不據實上聞。仰懇皇上勒令查明豁減。爲此具奏。伏乞睿鑒。謹奏。

乾隆三年十月初六日。

河南巡撫臣尹會一謹奏。爲欽奉上諭。據實覆奏事。竊積貯爲地方之本計。而節儉實民生之良圖。我皇上宵旰疇咨。睿謨廣運。以河東兩省收成頗豐。亟宜買補倉穀。恐時價不敷。有司逡巡觀望。令臣等酌量籌畫。又因豐收之後。小民任意奢靡。特命多方勸諭。以留有餘。先事綢繆。所以爲倉儲民食計者。誠無微不至也。臣敬將欽奉諭旨。刊刻告示。徧發曉諭。俾百姓食時用禮。共勵節儉。一體欽遵。至各屬應補倉穀。現在陸續交倉。惟是河南居天下之中。四通八達。向有外省客商。在豫販糶。今歲直隸、江南等省。又有歉收之處。採買搬運。較之往年更多。故收穫雖豐。而價直日昂。誠如聖明洞鑒。臣細加查核。惟河北地方。及接壤鄰省。水陸可通之處。爲然。尚非通省如是。臣已行令各州縣。如本地價昂。平糶之銀不敷。買補即在鄰邑價賤之地採辦。倘鄰邑價直亦屬相仿。即將不敷銀若干。據實報明。在於別屬買補盈餘銀內。通融撥給。速爲買貯。可無賠墊之虞。臣又思儲積之道。不厭其多。民食所資。不妨於廣。查豫民食用。以麥爲上。而高粱、蕎麥、菽、黍等項。均爲饔飧所常需。并飭地方官。如果穀價昂貴。一時購買維艱。即查明雜糧。

若干可抵穀一石。參酌糶貯。來春青黃不接。先儘此項糧食。或糶或借。以濟民食。以免陳朽。秋收之後。易穀還倉。亦推廣儲蓄之一法也。再。新舊民欠穀石。現在催還。但查河北彰、衛、懷三府。夏秋之交。間被水淹。雖經補種。仍獲有收。但多係雜糧。粟穀本少。且辦漕之後。穀價未平。在有穀之戶。以穀完納。而無穀之戶。必須糶賣雜糧糶穀還倉。一出一入。不無虧折。未免延挨。催徵不前。臣復與布政使范璨酌商。如河北百姓。願以雜糧完官者。亦准其照穀價折算交收。統俟來春。一體糶借。秋後易穀。庶小民踴躍輸將。而倉儲不至虛懸矣。所有臣欽遵諭旨。酌量還倉。及現今辦理緣由。理合覆奏。伏乞睿鑒。謹奏。

乾隆三年十一月二十四日奉硃批。如此酌量情形。辦理甚佳。知道了。欽此。

河南巡撫臣尹會一謹題。爲請增辦漕價直事。該臣看得豫省。河以南。永城、鹿邑、虞城、夏邑、柘城、宜陽、新安、澠池、淮甯、商水、西華、項城、沈邱、臨潁、襄城、郟城、陝州、靈寶、閩鄉等十九州縣。相隔水次。四百里至八百里不等。漕糧輓運維艱。請照採買之例折徵。赴水次採買兌運。經部覆准。令各州縣折徵採買。遵照原定米價。每石給銀八錢。免其扣解節省。如果歲歉價昂。仍於臨時酌議題明。本年豫省河北地方。夏秋之間。大雨時行。窪地被水。收成未免稍減。且外來商賈。絡繹販運。以致糧價漸昂。據各縣摺報。水次米豆時價。每倉石價銀一兩一錢。有零。州縣額徵多者。採買三四千石。每石不敷銀二三錢。總計卽缺銀數百兩及千金不等。承辦之員。實難賠墊。應照上年之例。增給價銀二錢。共計應增銀七千六百五十兩零。在於道庫存發腳價。并節省耗羨銀內動支。相應具疏題明。仰祈皇上。睿鑒施行。謹題。請旨。

乾隆三年九月二十日。

河南巡撫臣尹會一謹題。爲籲懇復題增給辦漕價直事。該臣看得豫省河以南永城等十九州縣。漕糧折徵。乾隆三年米價高昂。請照乾隆二年每石增給二錢。題准部議。豫省乾隆三年秋收尙屬豐稔。非歉歲可比。令照原價。每石八錢給發採買等因。伏查河北地方。乾隆三年夏秋之間。大雨時行。山水驟發。低窪地畝被淹。及至水退補種。多係雜糧。並未補種粟穀。所以秋收之後。米價仍昂。且接濟直省小麥十萬石。均在河北水次就近採買。又有鄰省客商在豫糴販米糧日減。價直日長。況償兌漕糧。河以南十九州縣。雲集水次採買。價直愈難平減。臣細加訪查。每石委在一兩以外。豫省雖非歉歲。而米豆價直。各屬俱按五日一報。有文可憑。且市集之上。耳目難欺。若照八錢支給。各州縣養廉有限。實難勒令賠補。臣身任地方。旣已明知苦累。何敢不據情題請。仰懇皇上天恩。俯照乾隆二年之例。每石增給銀二錢。共銀七千六百五十兩零。在於道庫歸公鹽規。并節省耗羨內開銷。則州縣得免賠累之苦。將來承辦公務。庶不致畏縮貽誤矣。爲此具本謹題。請旨。

乾隆四年正月二十日。

河南巡撫臣尹會一謹奏。爲折徵州縣辦漕價直不敷。再行據實奏請。仰祈睿鑒事。竊漕務爲天庾之本計。轉輸乃作貢之常經。必須無累官民。而後行之經久。豫省河以南州縣。遠隔水次。辦運維艱。是以本折異議。迭爲更張。前撫臣富德。因學士方苞條奏。復請改徵折色。奉部以京倉粟米。未便匱乏。行令悉

心籌度。臣蒞任之後。酌議將祥符等三十一州縣。仍徵本色起運。其永城等十九州縣。折徵銀兩。令各該州縣赴河北採買兌運。部議覆准。奉旨俞允。欽遵在案。惟是河北地方較之南汝等處。糧價本貴。近今以來。生齒日繁。兼之路通直隸。山陝商賈販運。絡繹不絕。地之出產有數。人之取資無窮。即遇豐年。而穀價亦不甚賤。故前於遵旨定議。請復漕運舊制案內。原議請照時價核實報銷。若正價不敷。即於所存腳價銀內通融添給。部議以時價貴賤不一。難於查核。令每石徵銀八錢。如果歲歉價昂。臨時酌議辦理。隨於乾隆二年題明增價二錢在案。迨至乾隆三年夏秋之間。大雨時行。山水驟發。窪地被水。雖不成災。而秋收已減。水退之後。農民補種者。多係雜糧。並非粟穀。米價昂貴。與乾隆二年無異。是以仍行題增。奉部以秋收尙屬豐稔。不准添給。又經臣以實在價昂。各屬萬難賠墊緣由具題。茲奉部覆。以上年收成統計八分。尙請增給。設遇歉歲。勢必增添愈重。應將每石增給二錢之處。毋庸議。咨行到臣。伏查上年豫省收成。原係合省統計。實有八分。若就衛輝所屬辦漕之地而言。則自七分以至八分不等。雖不爲歉。亦非十分豐收可比。況河北米豆價直。先據各屬開報。每石均係一兩一錢以外。臣恐或有虛捏。細加訪查。復經糧道黃叔敬親至衛輝。查察屬實。萬耳萬目。難容欺飾。即每石加增二錢。尙有不敷。若照八錢支給。糧少之州縣。約賠銀數百兩。糧多之州縣。賠墊更多。州縣養廉有限。奚能堪此。在不肖之員。無項可墊。勢必攤派里下。仍屬累民。其自愛之員。雖令竭蹶賠補。而今秋辦漕。必致藉詞推諉。採買不前。貽誤漕糧。攸關非細。即概行參處。究於公事無濟。竊念永城等十九州縣。題請折徵。原爲官民除累。今小民得免輓輸之苦。而

原價不敷。民累雖去。官累實增。仰惟聖主體恤臣工。無微不至。臣身任地方。辦理公務。如果屬員浮冒。自當據實嚴叅。如果價直昂貴。自當從公酌給。今既目擊其賠累。而乃隱忍不言。則下何以對僚屬。上何以副聖明。故不敢因部臣之兩經議駁。而終於緘默。爲此據實直陳。伏乞皇上天恩。俯照乾隆二年之例。每石仍准增給銀二錢。共銀七千六百五十兩零。在於道庫歸公鹽規。并節省耗羨內開銷。不惟州縣免賠墊之累。而轉瞬辦漕。不致畏縮貽誤。實於漕務有裨。臣不勝激切悚惶。待命之至。謹奏。

乾隆四年五月十一日。

河南巡撫臣尹會一謹奏。爲遵旨議奏事。乾隆四年四月初七日。蒙皇上發下刑部侍郎鍾保條奏一件。奉旨酌議。仰見聖主廣諮博採。執兩用中之至意。臣欽遵諭旨。悉心酌議。敬陳睿鑒。一。據奏摺內開鬪毆之案。由於好勇鬪狠者固多。其間亦有本無仇怨。或因田產錢債微嫌起釁。先向州縣控告。不行准理。或拘審遲延不結。或剖斷未盡平允。以致愚民心懷不甘。釀成人命等語。伏查民間鬪毆命案。因微嫌細故。彼此爭執。釀成人命者居多。其因不准不結。剖斷未平。忿爭斃命者。十無一二。是以昔年聖祖仁皇帝特製上諭十六條。頒行垂訓。又蒙世宗憲皇帝摘出鬪毆人命律文。明白曉諭。每月朔望。地方官於講約之所。齊集鄉民。宣讀講解。以警愚頑。以息爭訟。法至善也。臣又因教化之責。首在紳士。復令所屬社中生監。各就宗親鄰里。將睦鄰任卹之道。隨時勸諭。凡所以化導於平時。以杜命案之源者。豫省現在奉行。又查定例。州縣自理案件。限二十日審明結案。每月將作何審斷之處。造冊呈送上司查考。立法已屬周

詳。但恐日久漸弛。應如侍郎鍾保所奏。令督撫董率有司。務期悉心化導。清理詞訟。照例將自理案件。每月造冊呈報。如有任意拖延等弊。卽行叅處。庶兩造之忿爭自息。而無釀成人命之慮矣。一據奏摺內開。保甲之法。十家爲牌。一家窩賊。九家連坐。今各省亦皆舉行保甲。無如愚民既惜鄉情。復畏仇恨。往往明知匪類。隱忍不言。而地方官承審盜案。惟究正犯。從無查問保甲。是以門牌徒設。而窩匪如故。等語。伏查定例。強盜窩主之鄰佑。知而不首者。杖一百。牌頭於所管內。知有爲盜之人。瞻徇隱匿者。杖八十。若牌頭曾於甲長保正處首告。而不行轉首者。甲長照牌頭減一等。保正減二等。發落牌頭免坐。是鄰佑保甲。徇隱盜窩。均有治罪之條。應將侍郎鍾保所奏。查明容留之該管地方保甲牌長。責懲發落之處。毋庸再議。但鄰佑牌甲。顧惜鄉情。復畏仇恨。明知匪類。隱忍不言。亦情之所必有。臣再四籌酌。惟有公舉密首之一法。同甲之中。有爲盜爲窩者。許鄰佑牌甲公同舉告。如畏其仇恨。許赴官密首。地方官訪確查拏。不得將原首之人宣露。拏獲審實。將舉首之人。密行給賞。倘或挾仇陷害。則治以誣告之罪。如明知容隱者。發覺之日。仍照例責處。則賞罰旣明。瞻徇自少。保甲咸知做懼。匪類不敢窩留。於弭盜之法。似有裨益。謹就愚昧之見。議奏。是否有當。伏乞聖訓。謹奏。

乾隆四年四月二十二日奉旨知道了。著照所議行。欽此。